



Archdiocese  
OF Wellington



# Caulogologo

## O LE MANATU KERISIANO I LE LIUTINO MA TAGATA

TESEMA 2018

O le Atua le Alo, le Peresona Lua o le Tasitolu Pa'ia, "ma lo tatou fa'aolataga...na liutino tagata o Ia i le Taupou o Maria, ma ua avea ai o Ia ma tagata" (Ta'utinoga o le Fa'atuatua/Naisia) o le fa'avae lea o le talitonuga Kerisiano. E sili atu lona fa'avae mautū i lo le a'oa'oga i le Tasitolu Pa'ia, ona o le natura o le tolu o ipotasi a le Atua na fa'aali e ala i le Liu Tino Tagata o Keriso. O a'oa'oga ma talitonuga e uiga i le natura o le Atua o misitelio ia o le fa'atuatua, e mauluga atu i mafua'aga a le tagata, ae lē felotoa'i ai. O mea tau i le Liu Tino ma le Tasitolu ua tula'i mai ai se fa'afitaui mo manatu e lua, e fa'apea o se mea e le mafai ona tasi pe lua pe tolu fo'i i le taimi e tasi. I le va'aiga i le Tasitolu, e mafai ona tatou fa'apea: o le manatu masani o se "tagata" e mana'omia ai le tu'utō o mea e gata, ta'ito'atasi pe vaevaeina, ae o le tagata mamana e fa'amoemoe i le va fealoa'i, ae le fa'amoemoe i se isi mo lona ola ai, ae ua alagatatau. O le mea lea afai o le mamana e le gata, ma o Peresona o le Tasitolu e tutusa, ua mafai ona ātua fua o se tasi ma e le mafai ona vaevaeina. Ae o le fa'afituli fa'alemafaufau i le Liutino ua foliga mai e sili le faiga'ā, ona ua fa'amausalī e lē o le tasi o se mea ae o le lona o natura ua tasi i se tagata o le tala fa'asolopito: Iesu o Nasareta, o le tagata atoatoa ma le Atua atoatoa. I le fa'ai'ui'u o le seneturi 11, sa fesiliglia ai e se ali'i e igoa iā Anselm pe aiseā na liu tino ai le Atua, sa va'ava'ai le 'au fai telosia pe fa'apefea ia Keriso ona avea ma Atua moni ma tagata moni. I le amataga o le seneturi muamua, o le manatu o le liutino sa fa'amanino lelei e Sagato Ioane i lana Evangelia (ma ua i ai fo'i i le tusi a Paulo) sa le maua i folafolaga a le Ekalesia e uiga ia Keriso. E le maua i ni fa'amatalaga a'ia'i mai isi Evangelia, ae o lo'o manino mai i le tala o le asiatisiga a le Agelu o Kapeliele na tusia e Luka o le fa'auō a Paulo: "E afio ifo le Agaga Pa'ia i luga iā te oe, e fa'amalumalu ifo fo'i iā te oe le mana o lē Silisili'e; o le mea lea e ta'ua ai le tama pa'ia e fanau mai, o le Alo o le Atua." (Luka 1: 35). Ae o fa'amaumauga lava a le tusi evagelia o le lauga a Petelo i le aso o le Penetekoso (Galuega 2: 14 – 36; cf. 5: 29 – 32) ma na tautala ai fo'i Setefano ae le'i maliu fasia (Galuega 7: 1 – 53) ua fa'aali mai ai o la'ua uma o lo'o folafolaina o "Iesu o le Keriso" na valavalina e perofeta (Galuega 5: 42) i ni fa'aupuga e le malamalamā i ai le 'au Iutaia ua talitonu lava i le Atua e tasi. Sa a'oa'o atu Paulo i mea na tu'ulima mai iā i latou na a'oga ai, fa'apea Apollo na fanau i Alesana, o lē sa fa'aalia i le "mau upu ma poto i tusi" o le Keriso o Iesu (Galuega 18: 24 – 28). O le folafolaga lava lea e tasi ua feso'ota'ia le puapuagā o le Mesia i lona ulufale atu i le mamalu o lo'o va'aia fo'i i le lauga a lo tatou Ali'i i le ala i Emau (Luka 24: 25 – 27).

O lenei "telosia – le fa'aeaga" mai anamua ua le maua i ai le atoatoa o le manatu mai ia Ioane o lo'o fa'avae ai a'oa'oga a Naisia (o lo'o a'afia mai le tatalo o le fa'atuatua – Naisia). A o lena a'oa'oga sa i ai lava, ae o le fa'aletonu sa i ai, sa le maua e le 'au so'o le faiga o manatu sa fa'aoga e Ioane e a'oa'o atu ai i tagata Eleni fa'apaupau (sa le taliaina le manatu o le Atua ua avea ma tagata): o le Upu, e fa'avavau fa'atasi ma uiga tutusa ma le Atua, ua liu tino tagata (Ioane 1: 14) O Paulo mo lana vaega, na lu'iina le "atamai" o Eleni i le finafinu i le valea o le tala 'iga (1 Korinito 1 : 21). Ae o ia, e pei o Ioane, na talitonu i le "tutusa"

o le Alo ma le Tamā: Ma e pei o Ioane e fa'amanino mai pea le 'ese'esega "Keriso le Ali'i" mai le "Atua le Tamā", sa ia fa'atupulia se ulua'i talitonuga o le fa'afitaui lea i le "fa'apefea" ona mafai. E ui o Keriso sa uiga fa'atasi ma le Atua, ae na folafola e Paulo, ua sasa'a atu o ia e ia lava...i lona fanau mai fa'apei o se tagata) Filipi2: 6 – 7). O le faitaulaga agamalū a le Alo i le avea ma tino tagata na fa'auluulu i le "sasa'a mai o ia lava" sa mafai ona o lona itū tagata.

O ulua'i Tamā o le Ekalesia sa iloaina o le Liu Tino o se misitelio loloto e ao ona aga'i i ai ma le agaga metitasio fa'amaoni i le usita'i a le Alo, i le maliu lava lea i le satauro (Filipi 2: 8), na ala ai ona fa'atuina i le itū taumatau o le Tamā. Mo latou, o le telosia a Paulo i le Koluse, o lo'o fa'amausalī mai ai le tasi'aga ma le tagata o le Keriso puapuagatia e le'i fete'ena'i ai ae ua fa'aopopo i le Telosia o le Mamalu a Ioane ua fa'amanamafa maia le tasi'aga ma le Mamana o Keriso le Manumalō (*Christus Victor*). E pei ona matagofie ona fa'amatatalaina i le Atevetu a le itu-aiga a Orthodox Eleni (aso Tofi Vaiaso Muamua), "O le Koluse ua aumaia le fa'avavau ma le leai o se pala i le lalolagi – toe fa'aleleia mea uma ile ola". E le mo Apostetolo o le natura mama-na po'o Apostetolo o le talitonuga masani, na fa'amuta ai le galuega a le Atua i le si'itiaga i le Lagi. O lo'o tumau pea Keriso ma i tatou i aso uma, e ala i lona tino misitelio, le Ekalesia, fa'apea le Eukalisititia. O le Liu Tino o lo'o fa'auau pea se'i o'o i le gata'aga ma ona tua atu.

O le 'au fa'atuatua e masani ona manatunatu pe fa'apefea ona tali atu i le au fai telosia i aso nei ua a'afia tele i le mau i aso nei e te'ea le manatu o le "lua o natura" ae talitonu ile mau fa'apea o le malamalamā ma le iloa o le a'afiaga o o tatou lagona, ma e le manino toe nenefu. Atonu o le a sili atu pe a liliuina le fa'atuatua mai le fa'afitaui po'o se fesili faigatā pe fa'apefea i le mafanafana o le aiseā ma folafolaga o le talitonuga atoatoa o le tagata o Keriso – lona taliaina o tīgā, le fia'ai, lelāvā, fa'anoanoaga – a o ta'uta'u lona fa'atuatua fa'amaoni i le loloto o lona fa'atuatua i le mamana. Ua malamalamaina le manatu o le Atua i lona loto maualalo mo le fa'aeaia ile tagata, o le Liu Tino ua tatou maua mai ai e lē o se fa'afitaui, ae o le tali: o se vala'auina ina ia fa'asoia i le uiga o le ola. I lenā auala, ua mafai ai ona tatou iloaina o le Atua sa puapuagā mo tatou, o lo'o puapuagā pea i totonu o i tatou, o se Atua ua olioli – e lē o se tagata matamata ua maofa, ae o se malō sili ma le fa'aaloalogia i le faigā'ai a ē ua fa'amanuainaina.

Manuia le Fa'ai'uga o lenei Tausaga.

## AFOGA KATINALE JOHN DEW



### UŌ PELEINA

I le aso Gafua aso 20 Aukuso sa tusi ai Pope Faranisisi i tagata o le Atua e uiga i ni fa'aaliga talu ai nei i le faia o ni feusua'iga fa'atautala, fa'atautala o le paoa ma le malosi, fa'atautala o le lotofuatiaifo e le to'atele o nisi o le 'au ositaulaga ma latou ua fa'au'uina i le lalolagi atoa. Sa fa'anaunau lava Pope Faranisisi ina ia fa'aiola le mafatiaga sa tau'ave e le to'atele o latou e laiti, o latou aiga fa'apea le tagata laua'itele ona o nei soligā tulafono.

Fa'atasi ai ma le māasiasi ma le salamō na ioeina e Pope Faranisisi vaivaiга a le aiga ekalesia i nei soligātulafono. Sa ia tusia o le lautele ma le mamafa o mea uma na tupu e mana'omia le sapasapai mau fa'anu'u ma le ma'eua'ia'i. Ua mana'o o ia e lē gata o le ioeina mea na tupu ae ia 'tauave le fa'atautala ma se lima fesoasoani. O nisi o tagata ua fesili pe aiseā tatou te tatalo ai ma faia ni togisala ae tatou te le'i faia nei soligātulafono. Ae ui i lea o lo'o tu'uina maia se manatu mai iā Pope Faranisisi o la tatou tiute tau'ave o le taofia o nei faiga. Ua ia vala'au mai ai tatou uma lava e galulue i ni 'auala e mautinoa ai le saogalemū o le taimi nei ma le lumana'i o fanau laiti, le autalavou ma tagata matutua ae vāivai, ma ia finau atu i korupisia fa'aleagaga ma le fa'aogaina o tofiga e faia ai nei soligātulafono. Ua mana'o o ia ia avea i tatou ma vaega o le suiga fa'asosaiete ma le fa'aeekalesia e a'afia ai le liliuga fa'aletagata ma le fa'alenu'u ina ia va'ai i o tatou si'osi'omaga e pei ona va'aia i le Ali'i.

O nei suiga ma fa'aliliuga e lē manuia pe afai e toaitiiti i latou o le a galulue ai. O le va'aiga a Pope Faranisisi e mana'omia le galulue fa'atasi o tagata o le nu'u o le Atua ina ia fa'agalue ma taolaola ai ni leo ma ni suiga moni. Ua ia vala'auina i tatou uma mo ni tatalo ma le anapogi e matale ai o tatou fa'alogi i tīgā mai iā latou sa mafatia, ua tatou maua ai le galala i le fia inu ma le fia'ai mo se faimeatonu, ma o le a fa'agaioi ai i tatou mo gaioiga i le moni ma le agaalofa e feasua'i ai ituuaiga o fa'atautala, mo

le pule, feusua'iga ma le lotofuatiaifo.

O le Komiti a Faife'au (Council of Priests) sa va'ava'ai i nei tulaga i le aso 15 – 16 o le masina o Novema. O le aso na soso'o ai sa toe fono le Komiti ma isi Komiti e lua a le Pule'aga (Archdiocese Pastoral Council, Board of Administration fa'apea le Fono faufautua a Maori ma Fa'atonu Sili a le Pulea'aga). O le aso lea sa matou va'ava'ai ai i le tusi a Pope Faranisisi. O le isi la'asaga o lenei fa'agasologa o tatalo ma gaioiga, ou te vala'auina ai i tatou uma i le amataga o lenei vaitau o le togisala o le Atevetu e fa'aogā le sauniga o le salamō, e i lalo e sa'ilai le fa'amagaloga ma se fa'aliliuga.

Sauniga o le Salamō mo le aso Sa 2 Tesema (E tataloina iā outou Falesa i palisi po'o tou aiga)

Mo taimi ua tatou 'alo 'ese mai se va'aiga o le fa'atautala o le pule po'o le lē faimeatonu i totonus o le Ekalesia po'o le lalolagi, Le Ali'i e alofa mai.

Mo taimi sa matou lē fa'amautinoa ai le saogalemū o fanau, tupulaga talavou ma tagata matutua e vaivai, Keriso e alofa mai.

Mo taimi sa matou le fa'alogi ai i le fetagisi o latou sa fa'asauaina ma sa fa'atautalaina fa'afeusua'ina, Le Ali'i e alofa mai.

Le Atua mamana e ua e sao mai i o matou lapitaga ma aumai le moni, Keriso e alofa mai

Le Atua e te tu'itu'i mai pea o lau upu ua sau iā i matou i tagi a latou ua mafatia ma ua i le fa'ataus'i'us'i'u, Le Ali'i e alofa mai.

Le Atua agamalū, ua e manavaina le ola fou iā i matou mai le falemanu i Petele'ema ma le Koluse i Kalevalio, Keriso e alofa mai

Le Atua mamana e alofa mai iā i matou, fa'amagalo a matou agasala, ma avatu i matou i le ola e fa'avavau. Amene.

Tatou fa'amumū le selā muamua o le Atevetu o se manatuina fa'apitoa mo tamaiti uma, tupulaga talavou ma tagata vaivai sa fa'atautalaina e nisi o ositaulaga ma le 'au fai-tofi a le Ekalesia i Aotearoa Niu Sila

Ma Fa'amanuiauga uma

+ Ioane

## FAITAU LE TUSI PA'IA

### Evagelia a Ioane

Aiseā i le'au faitio ma le 'au masalosalo ona le mafaufau ai i le Evagelia a Sagato Ioane, ua le ta'ua ai lava lona igoa? Ona o latou ia e mumusu e talitonuina o Iesu o le Atua e lē talitonuina o sē na iloaina o ia e mafai ona tusitusia ni tala ma fa'amanino mai o ia lava o le Atua moni ma le Tagata. O tatou e matale o tatou mafaufau ua mafai ona faitau i le Evagelia mo tala ua tusia ai, ma "ia talitonu ai o Iesu le Keriso lava ia, le Alo o le Atua, ina ia maua ai fo'i le ola i lona suafa e outou o e talitonu" (Ioane 20: 31).

O le tala tele a le Evagelia ile faigamalaga, a o malaga atu le Ali'i i Ierusalemai Kalilaia. Mo le tala (Ioane 12: 27 – 30), lenei, na tu'u fa'aleleia e Luka mea mai puna'oa 'ese'ese, ona e pei ona ia fai mai, "e to'atele ua taumafai ona tusi fa'asolo le tala" (Luka 1: 1). O tala o le fa'amaloga, ma fa'ata'oto ua sili ona lauiloa, ua fesoasoani iā i tatou e malamalamā iā Iesu ma lana galuega tala'i. I le ala ua tatou feiloa'i atu ai i Aposetolo ma isi so'o, ma ua tatou va'aia ua auina atu e sauniuni le sau o le Ali'i. O fafine mai Kalilaia ua feso'ota'i atu i le fa'apopotopotoga ma tausia iā i latou.

# FAITAU LE TUSI PA'IA

E leai se mafua'aga e masalosalo ai i le tusi tala, "le so'o e alofa i ai Iesu," o Ioane le atali'i a Sepetaio, se tasi o ulua'i Apostetolo. O ia o se tausoga a lo tatou Ali'i, ma e masalo sa iloaina o ia a o laiti. Ua ia fa'amatala maia i lana tusi muamua sa va'ai iā Iesu, pupula to'a atu ia te ia ma pa'i atu (cf. 1 Ioane 1) ua ia aumaia le pa'i alofa fa'aletagata e uiga i lenei Alo o le Tagata – sa nofo i lalo ua vaivai, na mapu sela, ua tagi – ma na fa'amatala mai fo'i uiga o Fa'ailoga tetele na faia e le Alo o le Atua, na fa'ai'u i le fa'atoetuina o Lasalo. Ona o le Tagata sa ātu lona loto, ae o le Atua na aveina e lona Tamā.

E le tele ni fa'amatalaga i le Evangelia a Ioane, vaganā le Pasio: o le mea moni ua ia fa'apea ua tatou faitau i isi Evangelia, aemaise Sagato Luka. Na te le aumai se tala i Apostetolo e to'asefululua, na ona ta'ua o latou ina ua ta'ua Maria Matalena ua ia fa'amanatu mai ai o le fafine lea na mulumulua vae o Iesu (Ioane 11: 2, Lk 7: 38). O tala ua fa'amatalaina ua na o ia e maua i ai, ma ua ia tu'uina i ai fa'amatalaga a lo tatou Ali'i. Sa manatu nisi pe fa'apefea ia Ioane ona manatua nei tautalaga 'u'umi, aemaise tautalaga ile taimi o le Tausama'aga Mulimuli, ae ao fo'i ona manatua i lena vaitau o mea sa fa'aoga mo tusitusiga e 'ese le tau-gatā, sa mailoa lelei e tagata ona manatua. Sa fa'apelepele e Ioane nei tautalaga, sa toe Tautala ai lava o ia ma isi, ma fa'alili i le gagana Eleni, ona o le gagana lenā sa ia tusitusi ai.

A o'o mai i le maliu ma leToetū a le Ali'i, e fa'amamafa mai e Ioane o ia o se molimau sa va'ai. Ina ua na o ia mai Apostetolo, sa maua le loto tele e aga'i atu ai i le maota o le Ositaulaga Sili, ma mulimuli ai i le Ali'i e o'o lava i lona Koluse. Ua na o ia na maitauina lo tatou Tinā i le lolofi o fafine na uifiu i latou foliga, ma o ia na tu'u atu i ai ma le fa'atuatuaga le tinā e lana tama ua maliu. Sa ia fa'amaumaua ma le manino lelei fa'amatalaga, o Upu tonu i luga o le Koluse, ma le mea ofoofogia ole vai ma le toto na tafe mai i lona itū – na fa'amaonia i le malamlama'aga fa'afoma'i i aso nei e moni sa maliu o ia. Ma i le fa'ai'uga ua tatou maua se tala fa'aopopo o le tausama'aga ile taeao i i'a i autafa o le vai, ina ua oso i le vai Pateru i lona fa'anaunauga e sa'ili le fa'atoluina o fa'amagaloga mo le fa'atolu ona fa'afiti ma fa'alogi i le fa'apa'iaina a Keriso i le fafagaina o le lafu.

## SAGATO

### MARIA I MAKULATA – 8 Tesema

3

O le sulufaga na fa'aigoaina o Maria i Makulata na mafua a'e i le Ekalesia i Sasa'e i le seneturi e fitu. Na aga'i mai i Sisifo i le seneturi e valu. I le sefulutasi o seneturi, na maua ai le igoa ua i ai nei, Maria i Makulata. I le sefuluvalu o seneturi na avea ai ma sulufaga a le Ekalesia aoao.

I le tausaga 1854 o Pio IX na avea i ai le fa'aupuga ia mautinoga: "O Maria le Taupou Pa'ia, i le taimi muamua i lona tuputupu a'e i le manava o lina tinā, i le kalasia ma le igāga tō na tu'uina mai e le Atua silisili, i le va'aiga i galuega a Iesu Keriso, le fa'aola o le lalolagi, sa fa'asoaina mai pisia uma a le ulua'i agasala.

Na umi se taimi o tau fuafua lenei a'oa'oga. E ui i le tele o Tamā ma Faia'oga Sili o le Ekalesia na malilie fa'atasi o Maria o se sagata ua aupito sili le pa'ia ma sili atu i tagata pa'ia uma, sa tele ona faigatā iā i latou ona va'ai iā Maria e leai se agasala – i le taimi o lona foafoaga po'o lona olaga atoa. O se tasi nei o a'oa'oga a le Ekalesia na tupu a'e mai le fa'amaoni o le 'au fa'attuata i lo se malamalamā'aga ale 'au fai telosia popoto. E o'o lava iā i latou e una'ia Maria e pei o Bernard ma Tomasi Aquinas e le mafai ona iloaina le vala fa'atelosia mo lenei a'oa'oga.

O ni ali'i se to'alua o le ituaiga o Faranisisi, Viliamu o Ware ma Ioane Duns Scotus, na fesoasoani i le tau atia'e ma a'oa'o lea telosia. Sa la'ua fa'aalia maia o le Fanau Taupouina o Maria ua fa'atupula'iā le galuega fa'aola a Iesu. O isi tagata ua fa'amamāina mai le ulua'i agasala i se taimi mulimuli i le fanau mai. Iā Maria o le galuega a Iesu na malosi tele na puipua mai ai o ia mai le agasala tu'u fa'asolo mai le amataga lava.

### matua

O le Evangelia o le tala o se alofa o lo'o sa'ili, su'esu'e ma fa'apotopoto: le fafine sa su'e lana tupe na leiloa, o leoleo mamoe na alu e sa'ili lana mamoe, o le tamā na toe talia ma fa'amaopo mai lona atali'i na alu. Ae le'i fa'aalia maia e lo tatou Ali'i le auala e alu ai i luga o koluse mo tatou, sa ia fa'amatala maia lenā alofa i ana fa'ata'oto.

O le Ekalesia mai le amataga sa faia e pei ona a'oa'o o ia e le Ali'i. Sa ia fa'apotopoto latou ua tu'u lafotia ma fa'amafanafana le 'au fa'anoanoa ma le 'au matitiva. I Ierusalem o se tasi o popolega muamua a Apostetolo o le fa'aaauauna lea o le alofa atu i fafine ua maliliu a latou tane (cf. Galuega 6). Ma i Roma, o le Tiakono o Lolesio na talosagaina e aumai le lafoga a le Ekalesia i ali'i pule o le nu'u. Sa ia avatu le tupe i le 'au matitiva ma tamaiti e leai ni matua, ma aumai i latou i le malō: "o 'oa moni a le Ekalesia"

I o tatou nei aso, o Pope Penitito XVI na folafola: "Alofa mo fafine ua maliliu o latou tane ma tamaiti e leai ni matua, pagotā, ma le 'au mama'i ma latou ua le tagolima o so'o se ituiga e taūa i le Ekalesia e pei o 'au'aunaga o sakalameta ma le a'oa'o atu o le Tala Lelei. E le mafai i le Ekalesia ona 'alo 'ese mai le 'au'aunaga i le alofa e pei ona le mafai ona 'alo 'ese mai sakalameta ma le Upu" (Deus caritas est 22).

E pei ona masani ai, o Sagato/Sagata ua fa'atinoa le upu o le Evangelia. O Sagato uma o lenei masina o latou ia ua sa'ili ma maua mai, fa'apotopoto ma fa'afailele. O la latou popolega mo fanau ua tiā'ia ma fafine ua leai ma se fa'amoemoe, latou ua te'ea e le sosaiete, o le alofa lava lenā ua sasa'a mai i o tatou luga iā Keriso

## TALA'IGA O LUKA MA LE ALOFA

O sauniuniga mo tala'iga e mana'omia le alofa. Ua tatou fa'aavanoa ni taimi mo ni taimi paganoa na o tagata po'o ni mea ua tatou alofagia' (*Fiafiaga o le Evagelia*, 146). O upu ia na fa'amalosi'i au ai Pope Faranisisi i le 'au tala'i i le latou 'galuega faigatā ae matagofie o le tu'u fa'atasia o loto alofa, le loto o le Ali'i ma ona tagata.

O le aso 22 Tesema ma le aso 24 Tesema, o le Evangelia o le pese o le *Magnificat* – o le pese a Maria - "Ua vivi'i atu lo'u loto i le Ali'i, (Luka 1: 46 – 55), ma le *Benedictus* – o le Perofetaga a Sakaria - "Ia vi'ia le Atua o Isarael..." (Luka 1: b68 – 79). Ua tatou fa'alogo ma fa'aogā nei pese matagofie i le tele o taimi o le tausaga.

O le *Maganificant* ma le *Benedictus* o ni pese silisili mo vi'i-ga, o vi'i-ga ua tatou fa'amatala ai le Atua lo tatou Fa'aola. E i ai nai vaega e 'ese'ese ai. O le Magnificant mo le fa'ata'ita'iga, e tele i le na o le tagata e to'atasi. E fa'aogā 'lo'u' ma 'a'u e fa'alima, ma na o le tasi le taimi na se'e atu ai ile fa'alaua'itele: Na talanoa mai le Atua i o'u tua'ā'. O le Benedictus e fa'aoga o 'tatou 'ma 'o a tatou' e fa'asefulu, ae leai se "lo'u" ma "a'u". O le Benedictus e mata'iitū tele i tagata, a o le Maganificant ua matele ia Maria lava ia.

Ioe, o va'aiga mai le Magnificant ma le Benedictus e 'ese'ese. Ae o pese uma nei e lua e tutusa i le vivi'i i le Atua. Pe tatou te mafaufau ma tatalo ta'ito'atasi pe mafaufau ma tatalo fa'apotopotoga, o uiga o le Kilisimasi o le sasa'a atu lea o vi'ivi'iga ma le fa'afetai i le Atua, le Atua lo tatou Fa'aola na sau 'mai lugā e 'asi i tatou'. Ae ua na o se muai tātāina. O nei vi'ivi'iga ma fa'afetai e tatau fo'i ona fa'atumulua ai o tatou mafaufau ma loto i le tausaga atoa.

Simeona ma Ana

Ina ua aumai e Maria ma Iosefo le Tamaititi Keriso ma momoli atu o ia i le Malumalu (Luka 2: 22 – 40), sa feiloa'i atu i ni tagata matutua e to'alu, o Simeona ma Ana. A tatou fa'amanatu le Molimoliga i le aso 2 o Fepuari, o le sulufaga ua fa'amanatu ai le Tamaititi Keriso, ae ua fa'ailoa ai fo'i se toe'a'ina ma se lo'omatu.

Na malōlō le Agaga i 'luga o Simeona, ma na fa'aali iā te ia e le Agaga Pa'ia e le o'o mai le oti iā ia se'ia vaganā ua va'ai i le Mesia a le Ali'i. Ona sa ta'ita'iina o ia e le Agaga na ala ai ona sau Simeona i le Malumalu, ma opo mai le Tamaititi i ona lima, ma Tautala fa'aperofeta. O Ana fo'i na sau ma amata ona Tautala e pei o se perofeta (Luka 2: 36). Sa ia amata ona vivi'i i le Atua ma Tautala e uiga i le Tamaititi i tagata uma o lo'o sa'ilil le fa'aolataga mo Ierusalem.

E mālie lava, i le tala o le Momoliina e le'i fa'amatalaina mai na fa'aali e le Agaga Pa'ia ni mea iā Maria ma Iosefo ma avatu i ai ni fe'au fa'apitoa. E le o ta'ua maia fo'i sa

amata ona tautatala fa'aperofeta. Ua ta'u mai iā i tatou, ina ua aumai Keriso i Ierusalema, sa latou 'mulimulita'i i le tulafono a le Ali'i. E le gata i lea, o le faitauga lea mai le Evangelia a Luka, ua fa'alima ona ta'u maia sa faia e i latou e pei o le tulafono a Mose po'o le tulafono a le Ali'i (Luka 2: 22, 23, 24, 27 & 39).

E ao ona tatou maitauina o Maria ma Iosefo, sa leai se upu na tautatala ai a o la'ua aumaia le Tamaititi i le Malumalu. Sa filemū pea i la'ua. O tagata matutua, o Simeona ma Ana, sa ta'ita'iina i se 'aula fa'apitoa e le Agaga Pa'ia ma sa i ai ni upu fa'aperofeta e Tautala ai.

O tagata matutua fo'i i aso nei o lo'o ta'ita'ia i ni auala fa'apitoa e le Agaga Pa'ia, ma e i ai ni perofetaga e talanoa mai ai iā i tatou. Se'i o tatou aga'i atu i tagata matutua. Atonu ua i ai se fe'au tāua mo tatou uma, e o'o lava i se mea fa'apitoa tele e fai mai ai e uiga iā Iesu lava la, e pei o Simeona ma Ana.

'Aua ne'i Fa'amasinoina

"Aua tou te fa'amasino atu, ona lē fa'amasinoina mai ai lea o outou (Luka 6: 37). O se tasi nei o mana'oga fa'atōa na sau mai iā Iesu. E le fa'aopopoina i ai ni aiaiga. Mo se fa'ata'ita'iga, e le o fai mai: 'vaganā ua i ai ni mafua'aga tatau, 'aua le fa'amasino. Po'o, 'aua le fa'amasino vaganā ua i ai ni molimau mautinoa e lagolagoina lau fa'amasino-ga. Leai, na ona fai mai lava e aunoa ma se agava'a: 'aua le fa'amasino.'

O se tasi nei o mana'oga fa'atōa po'o ni 'tautalaga faigatā' na sau mai iā Iesu, e pei o le 'alofa i lē ita mai.' O le fa'aogaina o le mafaufau e le fesoasoani mo tatou i lea tai-mi. O a ni mafua'aga e alolofa atu ai i e ita mai? Aiseā tatou te le fa'amasino atu ai i isi tagata?

Pau le mea o le a mafai ai ona tatou talia ma fa'atino nei mana'oga fa'atōa o la tatou mafutaga fa'apitoa ma Iesu. Ua na o se mafutaga loloto ma ia ua mafai ai ona tatou alofa atu i o tatou fili, 'aua le fa'amasinoina atu i isi tagata, ma fa'atino atili le vala'aulia na tu'uina mai e Iesu iā i tatou.

Ia fa'amalosia pea e Iesu agalelei la tatou mafutaga ma ia. Ia aumai le loto toa e ola ai le olaga fa'atoa ua ia mana'o ai mai iā i tatou.

.....fa'aauau atu i le lomiga i luma.....

## PAPATISOGA MA LE KOFILIMASIO O LE FA'AULUFALE I LE EKALESIA

### Papatisoga ma le Kofilimasio: O Sakalameta o le Fa'aulufale i le Ekalesia

#### Folasaga

O le Ekalesia i aso nei i le tele o ala ua toe fo'i i le malamalama'aga fa'asakalameta a Kerisiano anamua. Ua tatou maitauina lelei lea i le taliaina o le sakalameta o le papatisoga, kofilimasio ma le Eukalisitia ua tu'u fa'atasia o sakalam-

ta o le fa'aulufale. A fa'aulufale mai tagata matutua po'o tamaiti tausaga fitu po'o le sili atu fo'i, o le tu masani o le patipatia fa'atasi lea o sakalameta ia e tolu i se faiga ua iloaina nei o le (RCIA): O le Sauniga o le Fa'aulufale o Kerisiano Matutua po'o Tamaiti (RCIC). I lenei tusitusiga o le papatisoga ma le kofilimasio o le a tu'u fa'atasia, ae 'ese mai ai le Eukalisitia. Ua faia lenei ina ia fa'amanino lelei ai vaega ia e lua: 1) o le papatisoga ma le kofilimasio o sakalameta o le fa'aulufale i le Ekalesia, 2) a o le Eukalisitia ole sakalam-

## PAPATISOGA MA LE KOFILIMASIO O LE FA'AULUFALE I LE EKALESIA

ta o le ‘au ai i le Ekalesia.

### O le Amataga Fa’atusi Pa’ia o le Papatisoga Kerisiano ma le Fa’ae’eina o le Agaga

O le vai o se fa’ailoga fa’anatura ma sa fa’aoagaina i sauniga o le fa’amamā fa’apea le fa’aulufale i le tele o seneturi. O le vai e fa’amamā ma fa’afou, e maua ai le ola ma e mafai fo’i ona mafua ai le oti. I vaitau o Iesu o le fa’aulufale i le fa’apotopotoga Iutaia e ‘a’afia ai ma le peritomeina, papatisoga i le fa’atofu ma le faiataulaga.

O le ituaiga o papatisoga i luma atu i le fa’aoagaina e Kerisiano o le vai o se sauniga o le fa’aulufale. O le tuputupu a’e mai le papatisoga o Iesu e Ioane i le vai o Ioritana aga’i atu i le sauniga Kerisiano o le fa’aulufale e umi toe lavelave.

I le Feagaiga Fou ua tatou faiataulaga ai ia Ioane le Papatiso o lo’o papatisoina i le vai o Ioritana o se fa’ailoga o le liua (Mareko 1: 9). Ua tatou faiataulaga i le papatisoga o Iesu ae leai se fa’amatatalaga pe na i ai nisi o le ‘au aposetolo na papatisoina i le suafa o Iesu, e leai fo’i ma se molimau mautinoa na papatisoina e Iesu nisi. Mulimuli mai i lona toetū, na amata ai loa e le ‘au so’o ona papatiso atu i tagata na talia le tala lelei sa latou tala’ia. O le papatisoga i le suafa o Iesu na avea ma faiga sa taliaina mo le fa’aulufale mai i le nu’u Kerisiano.

O le papatisoga Kerisiano a le Ekalesia anamua sa malamalamaaina o le taliaina o Iesu o le Fa’aoala na folafolaina. O nisi o taimi o aiga atoa sa papatisoina ae o le masani, o le papatisoina lea o tagata matutua ua fa’atuatua. O Sagato Paulo, o le a’oa’o i matapu silisili muamua ma se misionare maoa’e, sa tomanatu i lona a’afiaga fa’aliliuga ma le papatisoga fa’apea auala na a’afia ai ma isi. O lona malamalamaga’aga ua tatou maua mai ai se va’aina i le Ekalesia mai lona amataga.

O le ‘ese’esega e sili le taūa i le papatisoga o Ioane ma le papatisoga Kerisiano o lo’o ta’oto lea i lona fa’agaioiga fa’aekelesia lea. I le tulaga o le paptisoga o Ioane sa leai se āga fa’aekelesia ona sa le papatisoina i le suafa o le Atua. I papatisoga Kerisiano e i ai se fa’aekelesia ona o tagata o lo’o papatisoina, muamua, i le suafa o Iesu ona mulimuli mai ai lea o le Tasitolu (Tamā, Alo ma le Agaga). Ua tatou va’aina le ‘ese’esega i le va o le sauniga fa’amamā a Ioane ma le sauniga Kerisiano o le fa’aulufale.

Fa’atasi ai ma le tuputupu a’e o le fa’aulufale Kerisiano o se sauniga, na sau ai ma le tuputupu a’e o le malamalamaga’aga o nei sauniga e suia ai se tagata mai le lē o se Kerisiano ma avea o se Kerisiano. O sauniga ua fa’ailoga ai le ‘ese’esega ma fa’ailoa ai le va o le totino ma le lē – totino, talitonu ma le lē talitonu. Ua tatou va’aina lenei amataga mai tusitusiga anamua a Kerisiano.

Sa va’aina e Paulo mai le maliu ma le toetū o Keriso le uiga o lona fo’i a’afiaga i lona oti mai lona olaga muamua ma le toetū i se olaga fou. Sa ia fa’atusa fo’i le papatisoga i le peritome fa’-Iutaia o se fa’ailoga o le olaga fou i le Agaga, o se ‘aulua ua tu’u fa’atasia ai lē ua papatisoina i le tasi ma se auala o le fa’amalosi’au i lē ua papatisoina e faia le lelei. O le Tusi Muamua a Peteru, o le Tusi iā Eperu, o le Tusi Muamua a Ioane ma le Galuega a Aposetolo ua fa’alia nei mea tutusa. Ua latou fa’alia fo’i, e le tasi se faiga po’o se sauniga fa’aulufale. O nisi tagata ua aumai i totonu o ni fa’apotopotoga e ala i le papatisoga o le vai, o nisi o le fa’ae’e o lima i o latou luga ae o isi o le ‘au ai i le mea’ai fa’ale’ekalisitia. I le taimi fo’i lenei sa leai se fa’asologa mai le papatisoga ile vai aga’i atu i le fa’ae’e o lima ma aga’i atu i le laulau o le ekalisitia. O se mea na tuputupu a’e mulimuli. I le taimi nei fo’i, sa leai se fa’atanoa vai, ae sa i ai se vai sa fa’atofu ai le tagata.

O le vai la, na avea o se vaega tāua tele ona o se fa’ailoga o le ola ma le oti. O le tele o fa’ aupuga na ave i le papatisoga i le vai sa aumai mai le Feagaiga Tuai ma luma atu i taimi o Kerisiano. O le fa’atofu po’o le lolō i lalo sa fa’amatatala ai le loloto o le fete’ega’i i le va o le ola ma le oti e pei ona i ai i taimi ta’itasi o le olaga o tagata ta’ito’atasi.

O le faiga ua tatou ta’ua o le kofilimasio na amata mai i le fa’ae’e’ina o lima po’o le vala’auina o le Agaga Pa’ia i luga o le tagata. Na ave’ai ona faigoa lea o le fa’atasi ma le fa’au’uina ile suāu’u ma na iloaina o le fa’asinomaga ma na mulimuli ai ona iloaina i le Ekalesia i Sisifo o le kofilimasio e pei ona i ai nei.

O Kerisiano anamua sa latou a’afia i le mea sa talitonu i ai o le Agaga o le Atua ma na latou fa’amalosia i latou. O le Papatisoga o se sauniga ua fa’ailoa ai le taliaina o Keriso ma le tatala atu i lona Agaga. Sa fa’ae’ina le ‘fa’amaufa’ailoga a le Agaga’, le a’afiaga sa va’aina i o latou olaga. O Iesu, o ia lea sa nofo ai le Agaga ma o lona Agaga ua talia e lē ua talitonu.

O ulua’i molimau tusitusi mai le Tusi o Galuega, o Tusi Fa’alafulemū, o tusi a Ioane ma Tusi o Fa’aaliga o lo’o fa’alia o le fa’ae’e o lima e ‘ese mai le papatisoga i le vai. O nei puna’oa ua fa’alia o le avatu o le Agaga e mafai i luma mai ma le mae’ao le papatisoga i le vai.

I le fa’alaua’iteleina, o tusitusiga Kerisiano ua fa’asino i le nofoaga tatau a le Agaga i le olaga o le Ekalesia. O le Feagaiga Muamua po’o le Eperu e tautala mai le Agaga o le Atua o se meaalofa e uiga i le taunu’uga mulimuli o le tagata, ae o le Feagaiga Kerisiano po’o le Lua (Fou) o lo’o talanoa mai i le tagata o Iesu. I le malamalamaga’aga a Mareko ua tatou feiloa’i atu i le manatu e fa’avae i le afi ma le malosi ua o fa’atasi ma le papatisoga a Ioane, o elemane o lo’o fa’aoa nei i le sauniga Kerisiano. O le tagata ua fa’au’uina i ai le malosi.

O le malamalamaga’aga a Mataio e amata fo’i a Ioane le Papatiso ma e talitonuina le sau a le Agaga i luga o Iesu, o le puna’oa o meaalofa fa’aperofeta o le papatisoga i le Agaga Pa’ia ua molimauina. A o Luka, e malamalamaina le papatisoga o Iesu o se papatisoga i le Agaga Pa’ia, o se siniautū ua toe molimauina i Galuega a Aposetolo. O tusitusiga a Ioane o lo’o manino mai ai le nofoaga ma le alagatatau o le Agaga i papatisoga.

O le uiga ole Agaga i le Ekalesia o lo’o manino lelei i ‘aulua o lo’o gafa ma le Agaga e avea ma puna’oa o le tu’ufa’atasia o tagata o le Ekalesia: mo meaalofa o tagata, mo le atia’e o le Tino o Keriso. I nei aso, o le Agaga o se vaega mafana ma le tonu o a’oa’oga fa’avae a le Ekalesia. O le papatisoga lava ia o le fa’au’uina po’o le avatu o le Agaga. O le fa’au’uina mulimuli mai le papatisoga ua na o se sauniga ‘ese lava ia i le seneturi lona lua ma e fa’amesia i lona fa’atulagaina, i Sasa’ma Sisifo.

# UA FAOA LE KILISIMASI

O LE ASO Sa muamua o le Atevetu ua fa’ailoga ai le amataga o le Tausaga Fou a le Ekalesia Katoliko, matou te ofo atu ai mo’omo’oga mo se Tuasaga Fou pa’ia ma le fiafia ia Iesu Keriso!

A tatou manatu i le fa’atulagaga e le lalolagi o le Atevetu ma le taimi o le Kilimasi ua fetaui ma a latou fuafuaga fa’apisinisi. O nusipepa, o faleoloa ma aupega tafa’ilagi e le malōlō i le tu’itu’i ma le taulogologo mai pea mo meaalofa ua lelei mo tatou aiga. E tele nauā mea ua mafai ona fa’atau mo i latou e fa’ali atu ai lou alofa ia i latou ma e te taumafai e fa’afiafia i latou. O faigā fa’atau mo le kilisimasi ua avea ma fa’atiga ulu ona o le tele o mea e filifili mai ai. Ua misia atoa ai le uiga o le Atevetu o se taimi e sauniuni ai mo le Kilisimasi. Ioe, o le taimi e fa’ailoa atu ai iā i latou e te alofa i ai, e te manatu mo i latou ma e te mana’o e fa’aua sina taimi ma i latou ae mo le tele o tagata o lona uiga o le tele o fa’afiafia ua vala’aulia i ai.

I lana lauga i le Misasa o le vailuaga i le Vatikano i le Kilisimasi talu ai, na fa’apea mai ai Pope Faranisisi, “na fanau mai Iesu ma na te’ena e nisi ae na fa’aléano i ai isi.

Fa’apena fo’i nei aso, o lena fa’aleano ua i ai pea, i taimi

uma e avea ai le Kilisimasi ma aso malōlō ma avea ai i tatou ma autū i lo o Iesu; pe a una’ia ‘ese e molī i fa’amatama o faleoloa le moli o le Atua i le pogisa; pe a tatou naunau lava i meaalofa ae fa’aleano i o tatou tua’oi o lo’o i ai le mana’omia. O lenei fa’alalolagi ua faoa ai le Kilisimasi; e mana’omia ona tatou toe fa’asa’oloto maia!”

Sa fai mai pea o ia, “Fa’afetai ai ma leoleo mamaoe, tatou ulufale atu ile Kilisiamasi moni, o le aumaia lea ia Iesu o mea uma ua tatou maua, o le fa’avāga o tatou, o manuaga e le’i pepē, o a tatou agasala. Ona, ia Iesu, o le a tatou tofo ai i le agaga moni o le Kilisiamasi; le matagofie o le alofaina e le Atua. Fa’atasi ai ma Maria ma Iosefo, ia tatou mapu ane i luma o lona moega i le fale manu, i luma o Iesu, le na fanau mai o le falaoa mo lo’u olaga. O le tomanatuga i Lona aga-malū ma le alofa e lē gata, ia tatou ta’u atu iā te ia, “Fa’afetai. Fa’afetai ona ua e faia mea uma nei mo matou.”

## O LE FUAFUA ATU MO LE KILISIMASI

Malamalamaina o le Feagaiga Tuai

6

Pe sa mafaufau pe fa’apefea ona malamalamaina tusitusiga o le Feagaiga Tuai i luma atu o le fanau mai o Keriso? Ona o tatou o Kerisiano ua mafai ona tatou faitau ma fa’auiga le Feagaiga Tuai i le va’ai i le fanau mai o Keriso, lona maliu ma lona toetū ae a aunoa ma nei tala na fa’apefea i tagata Iutaia ona malamalamama i mea sa taumafai le Atua e ta’u atu iā i latou? O le Kapite a le Ekalesia Katoliko i le palakalafa 129 o lo’o fai mai, “O le Feagaiga Fou o lo’o natia i le Tuai ma o le Feagaiga Tuai ua tatalaina e le Fou.” Ona o le aogā le toe iloa mulimuli ifo, ua mafai ai ona tatou malamalamama lelei i le tele o perofetaga o lo’o natia i le Feagaiga Tuai.

Lapata’iga

I le vaitau o le tausaga 700BC o le perofeta o Mika na tusia, “A o oe Petele’ema – Efarata, e itiiti oe i afe o Iuta, a e tupu mai iā te oe mo a’u o lē na te fai ma faipule ia Israuel, o lona tupu mai talu mai anamuā lea, talu mai ona po o le vavau lava” (Mika 5: 2). Na auina mai e le Atua Mika e tautala i tagata Israuel e lapata’ia i latou ia suia a latou ala ma tu’ua’ia a latou amioga lē tatau. A leai o le a sau se mala iā i latou. Ae o le a lava le mea e tupu, o le a auina mai e le Atua se Fa’aoela e sau mai le laina a Tavita, le ituaiga o Iuta o lona tupu’aga mai le ‘a’ai o Petele’ema.

O Nisi Perofeta

I le taimi tonu lea na faia ai e Isaia ni perofetaga e uiga i le fanau mai o le Mesia na folafolaina, “O le mea lea e tu’uina mai ai e le Ali’i lava le fa’ailoga iā te outou; fa’auta e tō le taupou ma fanau mai se tama tane; na te fa’aignga fo’i iā te ia o Emanuelu (Isaia 7: 14). O Ieremia o le isi perofeta sa soifua mai le tausaga 600BC. Fai mai o ia, “Fa’auta, e o’o mai ona aso, o lo’o fetalai mai ai le Ali’i, ou te fa’atupuina ai mo Tavita le La la’au amiontonu, e pule fo’i le Tupu, e manuia o ia e faia fo’i e ia le fa’amasinoga ma le amiontonu i le lalolagi. O lana nofoa’iga e fa’aoalaina ai Iuta, e nofo fo’i Israuel ma le filemū; o le suafa fo’i lenei e ta’ua ai o ia, “O

LE ALI’I LA TATOU AMIOTONU” (Ieremia 23: 5 – 6). I faiatauga i Misasa o le Atevetu o le a tatou fa’alogo ai i nisi o perofeta mai le Feagaiga Tuai o lo’o talanoa mai i le fanau mai o Iesu.

O Nisi Va’aina

O lo’o i ai se fa’amatatalaga matagofie o se ‘ali’i amiontonu’ i le Poto, Mataupu 2: 12 – 20. O le Iutaia na tusia lenei tusi, sa fa’apea na aumau i Aikupito i le va o le 80 ma le 50 BC – luma atu o Keriso, na fa’aosofiaina e le Atua e tusia nei upu. ‘Lenei, ia tatou fa’atatalitali mo lenei tagata amiontonu auā e lē aogā o ia iā te i tatou ma ua te’ena e ia la tatou amio, ua ta’u leaga o ia iā te i tatou ona ua tatou soli o poloa’iga, ua fa’amasiasi iā i tatou ona ua tatou solia o tulafono na a’oa’oina ai i tatou. Ua fai mai e iā te ia le poto o le Atua, ua ta’u fo’i o ia o le atali’i o le Atua. Ua avea o ia ma sē fa’amasiasi i o tatou faigāmanatu. E mafatia lava i tatou i le va’ava’ai i ona mata, auā e le tusa lona olaga ma isi tagata ma ua ‘ese lava ona ala. Ua ia tāofi ifo o i tatou o tagata fa’afiaula, ua ia ‘alo ‘ese i o tatou ala, ua pei lava o ni mea ‘ele’elea iā te ia; ua fa’asilisili e ia le i’uga o tagata agatonu; ma ua ia mitamita e ta’u le Atua o lona Tamā. Inā tatou va’ava’ai ia pe moni ana upu, ia tatou tofotofo po’o a mea o le a o’o iā te ia, ona tatou iloa lea pe fa’apefea lona i’uga. Auā afai o ia o le atali’i o le Atua, na te puipui lava iā te ia, na te lavea’i iā te ia a’i lima o ona fili. Ia tatou tofotofo iā te ia i tauemuga ma puapuagā, ina ia iloa ai po ua aga-malū ma ia tofotofoina lona onosa’i. Ia tatou fa’asala iā te ia i le oti e aupito leaga, pe tausia lava ia e pei ona ia fai mai ai.” O se fa’aliga ua matuā sa’o lea ua tusia e uiga iā Iesu ae le’i fanau mai. Ua fa’amatatalaina ai fo’i ma lona agalelei na su’esu’eina i tauifaiga ma puapuagā, a o maliu i luga o le Koluse ae o lo’o tatalo pea mo latou sa fa’asalaina o ia, “Lo’u Tamā e, ia e fa’amagalo atu iā te i latou; auā ua latou lē iloa le mea ua latou faia” (Luka 23: 34).

Su’esu’e Atili

O nisi nei o tala mai le tele o perofetaga a le Feagaiga Tuai o le fanau, olaga, maliu ma le toetū o Iesu na fa'ataunu'uina. Aiseā e te lē sa'ilili ai mo nisi e 'oe lava. Atonu o le isi tusi se'i o tatou va'ava'ai i ai o Isaia, mataupu 40 – 55, o lo'o talanoa mai ai Isaia i le fa'amafanafanaga o lo'o mana'o le Atua e 'aumai iā Isarel. O Tusi Pa'ia o lo'o aumai ai ma fa'aopopoga o tusi fa'atasi ai ma le Feagaiga Fou ua fesoasoani lea mo tatou e malamalama ai i tala

fa'asolopito o tagata o lo'o fa'amatala e le tusi tala, ma e aogā tele mo le malamalama atili.

## O LE AVEFE'AU

E i ai le upu fa'aperetania ua ta'ua o le "Kerygma" e sau mai le upu Eleni o lona uiga o le avefe'au po'o lē e fa'ailoaina (folafola) le fe'au. I le Feagaiga Fou o lo'o fa'aogaina mo le fe'au o le Evagelia. Ona o lea, o Lē folafolā le Tala Lelei a Iesu Keriso ma le fa'aolataga na ia manumalo ai ma ofoina mai mo tatou. O lenei folafolaga e mana'omia ai fo'i ma se tali atu.

O le a le fe'au a le avefe'au? O se tali e fa'apea: "Iā Iesu, ua fa'aalia mai ai e le Atua o ia lava o le Tamā, Alo, ma le Agaga Pa'ia, ua fa'aleleia i tatou iā te ia, ma vala'auina i tatou e fa'asoa le olaga mamana i le Ekalesia." Po'o se isi fa'aupuga: "Na avea le Atua ma tagata ina ia maua e le tagata le ola. Ae na fuafua lava le Atua e fa'ataunu'u ana fuafuaga mamana." Ina ia malamalama i le Kerygma, atonu e fesoasoani pe a fa'amatala lelei i vaega e fa, tu'u fa'atasia ma le tala'aga o le fa'aolataga, toe fo'i i tua i le foaoaga, va'ava'ai i luma ile toe sau o Iesu i le mamalu, pe a iloa atoatoa fa'amanuiaga o le fa'aolataga.

E muamua la, o le lalolagi e i ai Lē na faia, sa i ai ana fuafuaga mo se lalolagi lelei ma le amiontu e fafia ai ona tagata. Lua, i le amataga o le tala'aga, sa te'ena e tagata fuafuaga a le Atua ma na o'o mai ai le tele o mafatiaga iā i latou. Ae ui i lea na mana'o lava le Atua e fa'ataunu'u ana fuafuaga, e ala mai folafolaga ma perofetaga e uiga i ia fuafuaga i tagata Iutaia, na ia filifilia e taliaina mo tagata uma o le lalolagi. Lona tolu, na avea le Atua ma tagata iā Iesu, ma e ala mai iā te ia o le a ia fa'ataunu'uina uma ana fuafuaga o le fa'aolataga. A o i ai i le lalolagi i le 2000 tau-saga talu ai, sa ia fa'aalia le moni e uiga i le Atua, tagata ma le fa'aolataga, na lagolagoina e wavega. Ona maliu ai lea ma toetū, ina ia toe fa'avae se tagata fou – o lana Ekalesia – fa'aleleia i le Atua e lana faitaulaga o Iesu, o le e talia le Agaga Pa'ia ma kalasia o le fa'aolataga.

E mulimuli lava, e ala ile fa'alavelave a le Atua iā Iesu, ua mafai ai e tatou ona talia nei fa'amanuiaga a le Atua, ma ia sauni e talia fa'amanuiaga o lo'o totoe pe a toe sau Iesu i le

mamalu i le fa'ai'uga ma fa'atulaga lelei mea uma. E mafai ona tatou 'au fa'atasi ai nei i fa'amanuiaga ia a Keriso e le gata o tatou talitonuga fa'apea o tatou fa'atuatuaga iā ia o le Atua, lo tatou fa'aola ma o tatou taumauga iā ia o lo tatou Ali'i, i le ola ai i le fa'atuatua, fa'amoemoe ma le laofa, ma 'au fa'atasi ai i le ola ma le galuega tala'i a le Ekalesia.

O le galuega fa'aola o le tagata na fa'ataunu'uina e le Atua, ae e mana'omia la tatou 'aufa'atasi ai. Ua filifilia fo'i e le Atua e fa'aogā Kerisiano o ni ana mea faigaluega e fesoasoani e aumaia tagata i lana fa'amanuiaga o le fa'aolataga. Ona o lea o la tatou galuega avefe'au e 'a'afia ai le fa'ailoa ma fa'amatala o Keriso le Atua ua ia fa'aleleia le lalolagi iā ia lava, ina ia tatou saununi ai e feiloa'i ma ia i le maliu, ma i lona toe fo'i mai i le gata'ana. E a'afia le fa'amatalaina i tagata pe fa'apefea ona tali atu ma le mautinoa; vala'auina i latou ina ia faia, ma mulimuli ai ona lagolagosua i tagata, fa'atasi ai ma le va'aiga fa'alafulemū, i le faia o lenā tali ma se amataga o le ola fa'aso'oina. Ina ia fa'aauau pea lenei galuega, e le gata tatou te mana'omia le fa'atuatua, fa'amoemoe ma le alofa, ae tatau ona ola a'i i olaga tatalo.

O galuega fa'aavefe'au e taūa ma o le autū ia o galuega fa'amisionare a le Ekalesia, e 'a'afia uma ai a'oa'oga fa'akapite ma tala'iga. E tatau i Katoliko ona iloaina le Kerygma: pe fa'apefea ona fa'amatala, puipui i ai, ma avatu i isi. Ua tatou faia lea i se malamalama'aga loloto i lo tatou fa'atuatua o lo'o fa'avae ai luga, ma fa'aoga lea malamalama'aga i o tatou olaga i aso ta'itasi.



### III. O LE MISITELIO A LE LALOLAGI

76. I le aganu'u a Kerisiano-Iutaia, o le upu "foafoaga" e i ai lona uiga lautele nai lo le "natura," ona e fa'atatau i le fuafuaga alofa a le Atua lea e i ai i so'o se meaola lona lava aoga ma lona taua. O le natura e masani lava ona va'aia i se faiga e mafai ona suesueina, ia malamalamai i ai ma pulea, ae o le foafoaga e mafai ona malamalamai i ai o se meaalofa mai le a'ao fa'aloaloa o le Tama o mea uma, ma o se mea moni ua suluia i le alofa lea ua vala'auina ai fa'atasi i tatou i le feso'ota'iuga lautele.

77. "O le upu a le Atua na faia ai le lagi" (Salamo 33: 6). Ua ta'u mai ai ia i tatou o le lalolagi na mafua mai i se i'uga o se filifiliga, e lē mai se vevesi po o se avanoa na maua, ma o le mea e fa'aeaina ai pea. O le foafoaina i le upu ua fa'aalia ai se filifiliga saoloto. O le atulaulau uma e le'i faia i se fa'ataunu'uga o se mana tele, po'o le fa'aalia o se malosiaga, po'o se mana'oga e tau fa'ailoa ai o ia. O le Foafoaga o le poloaiga o le alofa. O le alofa o le Atua o le fa'avae o le malosiaga na u'unaia ai mea uma na faia: "Auā ua e alofa i mea uma lava, auā foi ana e inoino i ai , po ua e le faia lava." (Poto. 11:25). O meaola uma lava o fua o le agamalū o le Tama, o Le na ia tu'uina atu lona nofoaga i le lalolagi. E o'o lava i le olaga le tumau o sē aupito itiiti o le fua lea o lona alofa, ma i ni nai sekone o lona ola, na fusia ai e le Atua i lona alofa. Na fa'amatalaina e Sagato Paselio le Sili le Atua Foafoa "o le agalelei e lē mafaitauina," ae ta'ua e Dante Alighieri le "alofa e si'itia ai le la ma fetu". I le fa'ai'uga, e mafai ona tatou o a'e mai mea na faia "i le silsiliese o le Atua ma lona alofa mamana."

78. I lea lava taimi, na manatu Kerisiano-Iutaia i se natura liliu fa'atalafatu. A'o fa'auauina pea ona fa'amemelo i lona matagofie ma le maoa'e, na le toe va'ai ai i le natura o se mea mamana. I le faia o lea tulaga, ua fa'amamafaina atili ai le tatou tiutetauave fa'aletagata mo le natura. I lea toe fuata'ina o le natura, e lē mafai ona maua o le totogi o le saolotoga po'o le matafaioi a tagata soifua, o tagata o i latou o se vaega o le lalolagi, ua i ai le tiute e tapu'e ai lo latou tomai ina ia puipuia ma atina'eina lona malosiaga. Afai tatou te fa'ailoa le taua ma le ma'ale'ale o le natura ma, i lea lava taimi, o tatou tomai na tu'uina mai e le Atua, ua i'u ina mafai ona tatou lafoa'i talafatu fa'aonaponei i le alualu i luma o meafaitino lē fa'atapula'aina. O se lalolagi ma'ale'ale, ua fa'atuatuaina e le Atua i le tausiga a le tagata soifua, e lu'itaufina ai i tatou e fuafuaina ni auala atamamai e fa'atonutonu, atina'eina ai ma fa'atapula'aina ai o tatou malosiaga.

79. I lenei atulaulau uma, ua saunia i auala tatala ma tulaga o feso'otaiga, e mafai ona tatou iloatino le anoanoa'i o ituaiga o so'otaga ma a'afiaga. O le mea lea e mafua ai ona tatou mafaufau i le atoaga i le tatala atu i le mana o le Atua, lea e atina'e ai. O le fa'atuatu e mafai ai ona

tatou fa'amatalaina le uiga ma le matagofie fa'amisitelio o mea ua fa'aalia. Tatou te saoloto e fa'aaoga lo tatou atamai i mea lelei e tutupu, po'o le fa'aopoopoina o ni vaivaiga fou, ni mafua'aga fou o mafatiaga po'o ni fa'afitauli moni. O le mea lea e mafua ai naunautaiga ma tala fa'atino i le talafa'asolopito o le tagata, lea e mafai ona fuga mai ai le saolotoga, le taolaola, le fa'aolataga ma le alofa, po'o le tata'i atu ai foi i le fa'atafunaina ma le fa'atamaia. O le galuega a le Ekalesia e lē na o le fa'amanatu atu i tagata uma lo latou tiute o le tausiga o le natura, ae fa'apea foi "le tatau ona sili atu ona puipuia le tagata soifua mai le fa'aleagaina o ia lava."

80. Ae o le Atua, e finagalo e galulue ma i tatou ma fa'alagolago i la tatou feaglegalea'iga, e mafai ai foi ona aumaia mea lelei mai mea leaga ua tatou faia. "O le Agaga Paia e mafai ona fa'apea e umia se fuafuaga e lē i'u, e talafeagai ma le mafaufau mamana, lea na te iloa ai le ala e tatalaina ai noataga o mataupu tau tagata soifua, e aofia ai mea sili ona faigata fa'apea ma mea e lē mafa'amatalaina." O le fausiaina o se lalolagi e manaomia lona atina'e, i se isi itu ua saili e le Atua e fa'atapula'a ia lava i se auala i le tele o mea tatou te manatu o mea leaga, mea lamatia po'o fa'apogai o mafatiaga, o le mea moni o se vaega ia o tiga i le fanauina o pepe fou, lea na te fa'aaoga e u'una'i atu i ai i tatou e galulue fa'atasi ma le Atua Foafoa. O lo'o afio le Atua i tagata ta'ito'atasi, e aunoa ma le fa'alavelave i le saolotoga o ana foafoaga, ma o le mea lea ua mafua ai le tula'i mai o sa'olotoga i tulaga fa'alelalolagi. O Lona afioaga paia, lea e mautinoa ai le saofaga ola ma le taolaola o le tagata, "e fa'auau ai le galuega o le foafoaga." O le Agaga o le Atua ua fa'atumulia ai le atulaulau fa'atasi ai ma avanoa, ma o le mea lea, mai le ta'ele o fatu o mea uma, o se mea fou e mafai ona fa'aalia i taimi uma: "O le natura o se mea e ese mai nai lo se ituaiga o ata, ua fa'aigoa o le ata a le Atua, ua fa'agae'etia i ia mea, ma ua si'itia atu i se fa'aiuga ma'oti. E pei lava o se tagata fauv'a a e mafai ona tu'uina laupapa i le mea e mafai ai ona fa'agaoioia i latou lava e tauave le foliga o se va'a."

81. O tagata soifua, e tusa lava pe tatou te fautuaina le fa'agasologa o se suiga, e i ai fo'i se taofi iloga e tasi e le mafai ona fa'amatalaina atoatoa e ala i nisi mataupu e tatala e lea suiga. E tofu i tatou uma ma ona lava fa'asnomaga patino e mafai ai ona tatou talanoa ma isi fa'apena foi ma le Atua. O lo tatou tomai i mafaufuga, le fa'atupuina o ni finauga, o le fafauina, o le fa'amatalaina o le mea moni o le olaga ma fa'atino i ata, fa'atasi ma isi tomai ua le mafai ona tā'ua, o fa'ailoga ia o se tasiaga ua sili atu nai lo le li'o o le fisiki ma le vasega o suesuega fa'ameaoila. I le alia'i mai o mea fou fa'atoā tutupu ua a'afia muamua ai se tagata i totonu o le lalolagi o mea faitino, e manaomia ai se gaoioiga tu'usa'o a le Atua ma se vala'au patino i le ola ma le so'otaga i le itu o le "o Oe (Thou)," lea ua fa'ailoa atu ia lava i le isi "oe". O tala fa'atusi paia o le foafoaga ua vala'aulia ai i tatou e va'ava'ai i so'o se tagata soifua o se mataupu e lē mafai ona fa'aitiitua lona tulaga i se isi mea faitino.

82. Ae peitai, o le a sese foi le va'ai atu i isi meaola pei ua avea o ni mea e fa'aaogaina i lalo o le pule malosi a tagata. Pau a le manatu o le natura o le puna o tupe mama ma le manuia, lea ua i ai ni i'uga ogaoga mo le lautele. O lenei vaa'iga mamao "atonu e sa'o" ua afaina ai le tele o faiga lē tutusa, amioletonu ma amioga sauā fa'asaga i le toatele o tagata soifua, talu ai tamaoaiga e i'u i lima o e na muamua po'o e sili ona malolosi: o lē manumalo e avea uma. E

## “IA VI’IA OE” (LAUDATO SI’ – Pope Falanisisi)

lē ogatasi ma lenei fa’ata’ita’iga manatu o le lotogatasi, fa’amasinogatonu, le fa’aleuso ma le filemu e pei ona fa’atulaga e lesu. A’o ia fetalai e uiga i pule malolosi o ona vaitaimi: “*Tou te iloa o alii o Nu’uese ua alitai i latou, o e ua sili foi ua pule ia te i latou; ae e le fa’apea outou; a o sē fia sili ia te outou, ia fai o ia ma a outou tautua*” (Mt 20: 25-26).

83. O le taunu’uga tupito o le atulaulau uma e atoa i le Atua lea, lena ua uma ona ausia e le Keriso toetu, o le fua o le matua o mea uma. O i’inā e mafai ai ona tatou fa’aoopo i ai se isi finauga mo le te’enaina o so’o se puleaga sauā ma le pule lē tatau a tagata soifua i isi meaola. O le fa’amoemoega tutasi o isi meaola e lē mafai ona maua ia i tatou. Ae peitai, o le gasologa o meaola uma o lo’o aga’i pea i luma fa’atasi ma i tatou, ma e ui mai ia i tatou ma aga’i atu i se nofoaga masani o taunu’uga, o le Atua lea, o lena si’itiaga atoatoa o lo’o fusia ma susulu ai Keriso toetu i

mea uma. O tagata soifua, ua fa’ae’e i ai le poto ma le alofa, ma ua maua e ala i le atoatoa o Keriso, ua vala’auina i tatou e ta’ita’ia meaola uma i lo latou Atua Foafoa.

**e fa’aaauau pea --fa’aliliuina: Falefou Sio**

## LEADERSHIP & MINISTRY TAITAI MA TOFIGA

***Fa’aliliuina mai tusitusiga a le alii Faifeau Malolo o Christopher Lightbound lē sa avea ma Faifeau Pule o le Pule’aga a Shrewsbury – Lauano A. Ilaoa)***

### (VAEGA 1)

O aso ua mavae i totonu o a’oga fa’-a-seminario, ao lei tauaofia le Vatikano II, sa tausi ma fa’-a-failele i tatou i se faiga tulaga ‘ese o le tofiga pelepitelo. O le faifeau (pelepitelo), o ia o se tasi o Keriso (*alter Christus*). Sa avea i tatou o tagata pa’ia, sa a’otauina e fafaga ma a’oa’o atu i le lafu mamoe. Sa malie a tatou miti ma mafaufauga i se soifuaga ato’ato’ a e tausi ai le lafu mamoe a le Alii. Sa tatou taumafai e faataitai i tu ma aga a le ituaga o le *Cure of Ars* ma aga fa’-a-faifeau i le polokalame i le televisé a le alii fai meamalie o Bing Crosby. O tatou o ni ali’i e vava mamao ma isi, sa ola i tu ma aga faa-Sagato, fiafia ma lalelei..ma e le tutusa ma isi tagata soifua.

O le mea mautinoa sa tele le mau faaletonu sa natia i na onapo tau amata. Sa iai le fa’apuga, o le lotomau, ae le o le “alofa fa’-a-faifeau”, o le pine lea ma le tulaga manaomia e latou o taumafai i le tofiga fa’-a-pelepitelo. Fa’amata e le tatau ona manatu, o tagata lotu o “isi foi ia Keriso”, e tusa o lo latou papatisoga? E le o latou foi e mafai ona fa’apea e tulaga ‘ese, o “tagata filifilia,... o pelepitelo mamalu,,o le malo mammalu,,o tagata o le Atua? (1. Pete 2.9-10)? Ona sosoo mai ai lea o le Komiti o le Vatikano: “O Kerisiano uma i soo se vaega o lenei soifuaga, ua vala’auina i le ato’ato’ a o le soifuaga faa-Kerisiano ma le matagofie o le alofa....o vaega ma matafaioi o lenei olaga, e anoanoa’i, ae tasi lava le paiaga” (*Lumen Gentium* (LG) 39-42).

E leai se suiga ua faia i le tofiga pelepitelo: o le avea ma auauna o le upu, sakalameta ma le tautuina o tagata o le Atua. E fa’apefea ona fa’aleleia le tatou matafaioi ma lagolago atu i tagata lotu ma a latou auaunaga e tautua ai ma le paia e tatau ai, i le vaofilifili o fa’afitauli o lenei lalolagi?

I le 46 tausaga na avea ai a’u ma lagolago ma mulimuli ane avea ma faifeau pule, sa faamanuina a’u, ona sa mafai ona ou molimau ma olaina fa’aiuga a le Komiti o le Vatikano (*Vatican Council*), i tottonu o aulotu ma ekalesia. Sa ou maitauina se suiga tele o le vafeagai ai o tagata lotu ma le aufaigaluega faifeau – mai le usitai ma le faaaloalo ile galulue feoeoea’i ma le felagolagoma’i. O suiga i le faatinoina o sauniga ma tapuaiga, sa faaosofia ai ia uiga lelei o le galulue faatasi o itu e lua. Ae ui o lea, ou te manatu, e faigofie lava i se faifeau ona galo ma le manatu mamafa i le soifua fa’aleagaga o tagata o lana aulotu, ae fa’ataua ia te ia na o lo latou aogā i le faitauina o afioga a le Alii, Auauna o le Eukalistitia, saunia o fugalaau ma teu o le falesa, atoa ma isi tulaga fa’apena. I lo’u tulaga o le faifea’u, atonu sa ou fua e a’u lava ia la’u galuega i lo’u iloa ona faatonu le aufaipese ma latou e tomai i le musika i tottonu o le palisi.

Malolo Litaea

Ou te manatua le taimi ina ua amata ona ou mafaufau i le taimi e malolo litaea ai mai le tofiga. O se tausaga sa pisi ma tumu i le mau vevesi, ona sa feagai ma le galuega o le fale fou (hall) mo le palisi. Ua avea mea masani a le palisi ma avega mamafa ia te a’u – o le tele o le mau papatisoga sa faia ae faapea ai faaipoipoga, o maliu ma le tapenaina o lauga, ae faapea fonotaga ma isi tulaga faapena. Na oo ina ua ou le toe alu e asiiasi i tagata lotu, se’ia vagana ai lo’u alu e momoli komunio mo nisi o le aulotu ua nofo fale. Na amata ona ou lagona i lea taimi, le sau o le matua ma ua le tutusa aso, aemaise o le tele o taimi sa asiiasi ai i aiga i le talatalu fou o le tulai mai i le tofiga.

Sa fa’apena ona ou malolo litaea ai mai le olaga auauna i le palisi, lea ua fitu nei tausaga talu ai. E ui ina ou misia, se vaega tele ole olaga faa-palisi, ae ou te le o fa’anoanoa i le suiga ua ou iai. E tele taui ma mea lelei – e pei ole sa’olotoga e fuafua lelei ai a’u lava polokalame patino, ma tele foi taimi mo isi mea patino ia te a’u, e aofia ai taimi tatalo. E fa’aoopo iai isi tulaga masani o le soifuaga, e pei o le tulaga o le tau i aso ta’itasi, o le tausiga o le togala’au, le matagofie o le laufanua ma le pisapisao o tamaiti pe a usuai i le aoga....

Ae pei o le taualuga o mea uma, o le fiafiaga sili e maua pe a mana'omia e auaua i se faaiuga o se vaiaso e malolo ai pe toseea se tasi o uso faifeau ona o se gasegase po o se isi tulaga. Ou te mautinoa, o se fiafiaga le ma'afolia lea mo le toatele o faifeau malolo. E sili atu ona faigofie lauga i tamai faapea nai lo aso ua mavae. E fiafia tagata lotu e faafogofa i se leo fou ma se lauga fou mai lea taimi i lea taimi. E faai-loa mai lava e tagata lotu lo latou talia ma le lagolagoina o le tautua ma le auauanga a faifeau ua matutua ma tele tau-saga o le soifua. O le tele o mana'oga masani o le galuega i totonus o le palisi, ua le o toe manatu mamafa iai, aua o mea ia ua i le taimi tuanai.

### Ole Pa'iaga i totonus o le malumalu

O ni fa'alapotopotoga tatalo sa ou a'afia ai i palisi mulimuli e lua na ou galue ai, na ou manino ai ma malamalamama i le loloto o le soifua fa'aleagaga o tagata lotu: "O le mea e potopoto ai le to'alua po o le to'atolu i lo'u igoa, o loo o'u auai fa'atasi ma outou" Ma o le ono o tausaga talu ona ou malolo litaea, sa ou matuā maofa lava ma fiafia, i lo'u mautinoa o tagata lotu e le gata o ni tagata paia ae o tagata foi ua amio mama ma le mata'u i le Atua. E foliga mai ia te a'u, o latou ia e moni ai le taofi o le Apostolo o Paulo i le ekalesia i Kolose: "O outou o tagata filifilia o le Atua, o ona tagata paia: e alofa mutimutivale o ia ia ia outou" (Kol3.12)

Ole taimi o le Misasa, e maua ai se siosiomaga paia e ala i talosaga, ma le fa'atuatua fa'apea ma le agaga ofoina atu. O o tatou tagata, ua foliga i la Keriso:, ua faatumulia i le mam-

alu ma le mana o le Alii, ua fefa'auoa'i, fiafia ma lima foa'i. O le pa'iaga moni, e faigofie ona maua faatasi ma vaivaiga ma fa'aletonu o le tagata soifua. Ae afai e te manatu e fa'atusatusa le pa'iaga moni i uiga ma amioga a se vaega loto tetele toaititi, e le tatau la ona faagaloina tausaga e tele e tausia ai e ni matua se tamaititi e le atoato'a le malosi, ae fa'apea ma latou e feagai ma le tausia mo tina ma tama ua matua lo latou soifua.

E malosi se lagona salamo ia te a'u ile tele o taimi- aisea sa tauaso ai o'u mata i aso ua mavae, ma ou manatu ai o la'u galuega fa'a-fafea'u, e na o le a'oa'o atu o le pa'iaga i tagata aulotu? E le o le mea mautinoa ea o le faafeagai o lea manatu? O talosaga a tagata lotu sa fa'apea ona ou tumau ai i le mea moni. Atonu pe o le mea moni e tu i le vaeluaga o pou ia e lua: ua tatou a'oa'o mai ile tasi i le isi, ma ua ou maua ai se meaalofa sili ona ttau: o le mau tufaaga lea i lo latou pa'iaga moni. (**Fa'aauau i le lumana'i**)

## SAGOLEGOLE

### O LE TALA I LE FE'E MA LE ISUMU

Sa fa'auo le isumu ma le uga. Ua o'o i le tasi aso na fai lea o la laua malaga i le vasa. Fau loa le va'a i le fau. Ua uma le va'a ona toso lea i le sami, e alu mala-ga. Sau loa le tuli, fesili atu pe mafai ona latou o. Ona talia lea o le mana'o le tuli.

Alu, alu pea le va'a, ona tau lea i le ava. Sau loa le galu tele, ua sa'e le va'a. Ona lele lea le tuli, ae goto le uga i lalo i le a'au. A o le isumu ia ua fa'asaga i a'au i gauta.

E le pine ona vaivai ai lea o le isumu. Ona fa'apea ai lea o le tagi a le isumu:

Si o ma va'a na fau;  
Goto le uga i le a'au,  
Lele le tuli, fai ona apa'au,  
A o ita nei 'au'au.

Ua va'ai atu le fe'e i le isumu o le a malemo, ona alofa lea i ai. Fai atu loa le Fe'e i le Isumu, "Sau ia ina ti'eti'e i lo'u ave." A ua musu le Isumu i ti'eti'e i le ave o le Fe'e. Ona fa'apea atu lea o le Fe'e, "Sau ia ina ti'eti'e i lo'u ulu." Ona ti'eti'e ai lea o le Isumu i le ulu o le Fe'e, o le a o i uta.

Ua tigaina ai Fe'e i le mamafa o le Isumu, a o le Isumu ia ua taui lona agaalofa i le agavale: ua fai lava le mea leaga i le ulu o le Fe'e.

Ua o'o atu i le matafaga, ona oso ai lea o le Isumu i le 'ele'ele matutu, a e toe alu le Fe'e i tai. Ona lagi lea o le pese a le Isumu, e fa'apea, "Le Fe'e, le Fe'e, tago ia i lou ulu, po o a mea o i ai." Tago loa le Fe'e i lon ulu, ua leaga lava. Ona o'otia lea o le loto o si Fe'e i le fa'anoanoa, aua o le agavale ma le fa'alemigao o le isumu.

Tagi loa le Fe'e i Lulu e fa'apea, "Lulu i sasa'e, Lulu i sisifo, Lulu o uta, Lulu o tai, se'i outou sa'ilia mai lo'u fili." Ua fa'alogi loa le isumu i le tagi o le Fe'e, ona lafi ai lea i totonus o le pu o le avi'i. Ona alu lea o le tama'i Lulu, ua tu'u ifo lona vae i le pu ma toso a'e le isumu. Ona saei lea o le isumu e Lulu.

E i ai ona ita pea o le Lulu i le Isumu. A o le Fe'e ia, ua ita fo'i i le pule, o le pule lea ua fa'aigoa o le pule ta'i Fe'e, aua e foliga i le isumu.

*Ia iā te outou uma le meaalofa o le fa'atuatua, o fa'amaniuaga o le fa'amoemoe, ma le filemū o Lona alofa i le Kilisimasi ma aso uma fa'apea se Tausaga Fou o fa'amaniuaga*



Manuia le Kilisimasi ma le Tausaga Fou i le tatou Matagaluega, aiga ma uō fa'apea i latou o lo'o mauaina lenei 'au'aunaga e ala i le Taulogologo.

11

## FA'AFETAI

O le a fa'ata'alolo ia le pa'ia tele o le la'au ma ona lau, auā o pa'ia ma mamalu o Samoa e o'o lava i le fa'avavau. Ae fa'asino tonu lenei fa'aaliga i le paia ma le mamalu o le tatou Matagaluega Samoa, Pule'aga Fa'aakiepikopo i Ueligitone.

Ua toe o se aga ona tatou aulia lea o le fa'amanatuina o le aso soifua o le tatou Ali'i Fa'aola. Ae avea lenei avanoa e momoli atu ai le agaga o le fa'amalo ma le fa'afetai mo galuega sa feagai ai i lenei fo'i tausaga. Fa'amalo ma fa'afetai i le vasega a ositaulaga, le Afioga ia Patele Petelo Mauga, Afioga ia Patele Maleko Api – Tufuga, le Aufaigaluega pa'ia a le Atua, le nofo ā Peresetene a Aulotu ta'itasi ma o outou ofisa, fa'apea Ekalesia ta'itasi a le tatou Matagaluega, i tiute ma 'au'aunaga i totonu o a outou palisi, o aulotu fa'apea le fa'atinoina o polokalame a le Matagaluega. E le galo fo'i le fa'afetai i lana Afioga Katinale John Dew mo lana pitola'u Fa'aositaulaga ma le Ta'ita'i auā le ta'ita'ia ma le lagolagosua mai e ala i Misasa ma le matafaioi Fa'aleoleomamoe. E le fa'agaloina fo'i ali'i Pelepitelo Malisi sa fesoasoani mai i nisi o taimi mo Misasa Samoa, Patele Denis O'Hagan ma Patele Rodrick Milne.

O lenei fo'i taimi e le fa'agaloina le ofisa tutotonu a le Matagaluega. Le fetalaiga ia Leapai Eli Malolo o lē sa ta'ita'i fono mai tausaga e tele ua mavae, le fetailaiga ia Tauloa Fa'atau sa lagolagosua i ai, Lesina Nanai le Failautusi ma Isapela Duffy le teuoloa.

O lo'o soifua le Atua alofa, o ia e tauia ma fa'amanuia iā te outou uma e ala i lau auauanaga ma lau tautua. Afai fo'i o a ni fa'aletonu sa feagai ai a o tatou mafuta i ia tausaga, fa'amagalo o matou tagata. Tatou aumaia fa'amanuaga o le Kirisimasi ma le Tausaga Fou e fai ma o tatou fa'oso a o fa'agasolo aso malolo. O nisi o le a faimalaga i atunu'u i fafo, fa'atasi le Atua ma outou. Latou e le faimalaga, tatou feloa'i i le tatou Misasa o le vaeluaga. Ia maua e le Matagaluega ma tagata uma lava le Filemū o Keriso.

Fa'afetai, Fa'afetai Tele Lava.

Salā Mikaele Teofilo

# FAITAUGA MO LE MASINA O TESEMA 2018

## ATEVETU

Mo lenei ta'amilosaga lona tolu o Aso Sa – le tausaga a Luka – o faiatauga muamua e le mai iā Isaia (e pei o isi ta'amilosaga e lua), ae mai perofeta 'ese'ese. O lo'o tele le Isaia i aso o le vайaso, ae ua ofoina mai nisi o leo mai le Feagaiga Tuai e tutusa fo'i a latou upu fa'amafanafana ma folafolaga. E le gata i lea o le Atevetu o se taimi e talanoa mai i folafolaga ma fa'amafanafanaga – ma i le olaga o tagata o le Atua – fa'apotopotoga po'o ta'ito'atasi – i aso nei ma masani ai, e telē le mana'omia mo ni upu o le fa'amafanafanaga ma folafolaga.

## FAITAUGA MO LE MASINA O TESEMA – 2018

**Aso 2 Tesema Aso Sa muamua o le Ateveu:** Faiatauga muamua: Ieremia 33: 14 – 16. Matua: Ou te fa'atupuina iā Tavita le La la'au amiontonu.

Salamo: 25: 4 – 5 (tali), 8 – 9 (tali), 10, 14 (tali). Tali: Le Ali'i e, ou te fa'anaunau atu iā te oe ma lo'u loto.

Faiatauga lona lua: 1 Tesalonia 3: 12 – 13; 4: 1 – 2. Matua: Ia fa'atumaunina o outou loto i le amio lelei pe a afio mai lo tatou Ali'i o Iesu.

Aleluia, Aleluia...Le Ali'i e, ia e fa'ailoa mai iā te i matou lou alofa; ia e foa'iina mai fo'i iā te i matou le olataga mai iā te oe...Aleluia.

Evagelia: Luka 21: 25 – 28, 34 – 36. Matua: E latalata ina fa'aolaina outou.

### Tofitofiga o le Upu:

Ua tatou tau mai i lipoti ma ni fa'amatalaga o mea mata'utia na tutupu i le lalolagi e fa'aoga ai upu e pei o le 'apolokalifa' ma fa'amatala i tulaga 'e pei o le i'uga o le lalolagi'. O nei gagana e masani ona fa'aoga e fa'amatala ai le fa'atafunaga ma le fa'aumatiaga. O faiatauga i le amataga o lenei vaitau o le Atevetu e masani ona aumaia se va'aiga o aso mulimuli – o aso o le mata'u e pei ona fa'amatala 'auiliili mai e Luka. Ae ui i lea o fa'ailoga ia o lo'o fa'amatala mai ai le sau o le Atali'i o le Tagata, e le aumaia ai le fa'aleagaina ae o le fa'aolataga! O le fa'atuatuaga Kerisiano e masani o Keriso o le a manumalō ma o le lelei e to'ilalo ai le gaogaosā ma le fa'aleagaina, ioe o Keriso e aumaia le fa'atonutonu i le i'uga o le taimi. O le mata'u fa'aletagata e masani ona feso'ota'i ma le lē iloaina – tatou te lē iloaina po'o afea e sau ai Keriso po'o a fo'i foliga o lenā, ma fa'ailoga o lo'o tumu i tusitusiga o le a atagia mai ai lenā leiloa i le fa'aogaina o ni gagana fa'asolo e maoa'e lona malaulau. Ae mo tagata o le fa'atuatu – ua tatou talitali Keriso e sau – e pei ona fai mai ai le Tusi Misasa: 'tatou te fatalitali mo lona toe afio mai' (EP3) ma o se mafua'aga lenā o le fa'amoemoe: tatou te fa'atalitali i le fa'amoemoe ma le fa'amanuiaga o le sau o le Fa'aola, Iesu Keriso (sauniga Komunio). I tua atu o fa'atusa taufa'afefe o lo'o aumai e tusitusiga pa'ia o lo'o ta'oto ai le fa'amoemoe mautinoa o Keriso e sau e lavea'i – 'o la tatou lavea'ina ua lata mai.'

Metitasio

Kalasia o le Atevetu

Se'i vagana ua fa'ate'ia o tatou loto ma mea tatou te mafaia, se'iloga foi e fa'atoilaloina le tagata, ona mafai lea ona tatou malamalama atoa i le taua o le Atevetu. Afai o le feau atoa i le afio mai o le Atua, o le aso o le fa'aolataga, le feiloa'iga ma le togiola, e foliga mai e sili atu na i lo se tala musuia fa'alelagi, po o se tala fatu o mea e lua e tatau ona taliaina e aunoa ma le fa'aaogaina.

Muamua, o le olaga e lē gata i le leai o se malosiaga ma sona aogā ia te ia lava, ae leai foi se mafua'aga po o sona taunu'uga. E leai se malosiaga ma sona aogā i totolu o lona lava tulaga o le olaga, ma o se i'uga foi o le agasala. I lenei mea e tatau ona fa'aopoopoina i le tagata faimalaga e fa'apea o le olaga ua manino le manaomia uma o le uiga ma le atoatoaaga.

O lona lua, e tatau ona iloa o le feagaiga a le Atua ma le tagata soifua, ua auai o ia ma i tatou, e fa'atasi o ia ma i tatou, e fa'asa'osa'oa le tulaga o le leai o se uiga lē aogā.

E tatau ona tatou nofouta i le filifiliga a le Atua e fa'alauateleina ai le tuaoi o lona lava olaga silisilise e ala i le fa'amaulaoloina e fa'asoa ma i tatou mo le fa'atoilaloina o le agasala ...

Pau lava le mea tatou te fa'alagolago i ai o le mea moni, o nei folafolaga ua tu'uina mai ma ia tausia ... E fesoasoani le Atua ia i tatou e saili o tatou lava tagata, ona tatou fulitua ai lea ia i tatou lava, ma toe foi atu ia te ia

# FAITAUGA MO LE MASINA O TESEMA 2018

## ASO 9 TESEMA ASO SA LUA O LE ATEVETU:

Faitauga muamua: Paruka 5: 1 – 9. Matua: E fa'aalia lava e le Atua lona mamalu i totonu iā te oe.

Salomo 126: 1 – 3 (tali), 4 – 5 (tali), 6 (tali). Tali; Ua faia e le Ali'i mea tetele mo i tatou; ua tatou fiafia ai.

Faitauga lona lua: **Filipi 1: 4 – 6, 8 – 11.** Matua: Ia avea outou ma e fa'amaoni, ma le lē ta'uleagaina pe a o'o i le aso o Keriso.

Aleluia, Aleluia...Inā teuteu ia outou le ala o le Ali'i, ia fa'alaulelei ona ala. E va'aia e tagata uma le fa'aolataga mai le Atua... Aleluia.

Evagelia: Luka 3: 1 – 6. Matua: E va'aia e tagata uma le fa'aolataga mai le Atua.

### **Tofitofiga o le Upu:**

O le perofeta o Paruka ua ofoina maia se va'aiaga agamalū o le alofa o le Atua aga'i i tagata Ierusalemua fa'ata'ape'ape ma tigaina. O le vaisaso fo'i lenei na amata ai le Tausaga o le Alofa a Pope Faranisisi – ma ua aumai e Paruka se āta mata-gofie o foliga o le alofa. O le 'a'ai na aumai i lalo ona o lona le fa'atuatua ma le leaga o le a toe fa'atuina i luga ma toe faia fa'amatagofie e ala i le alofa o le Atua, o lea e lē gata e fa'amagalo i ana soligā tulafono, ae toe fa'afō'i o ia i lona agalelei mutimutivale ma sapaia o ia i luga o lē na ia filifilia – ma o lenei ona o lona alofa.

Na fai mai na folafola e Ioane le Papatisoga o le salamō – ma o le upu salamō e mafai ona tau'avea se fa'atelega mamafa, ae o se fa'aupuga umi mai iā Isaia na tu'uina mai e Luka iā i tatou ua fa'atulaga lelei ai. O le Atua na amatalia, o le Atua o le a sau, ma 'o tagata uma lava o le a va'aia le fa'aolataga a lo tatou Atua.' Ona o le alofa o lenā fa'aolataga ua ofoina mai, o le Atua e sau e lavea'i. Ina ua tusi fa'amalosi'au Paulo i le 'a'ai o Filipi sa fa'amanino iā i latou o 'Lē na amatalia lenei galuega iā te outou o le a na fa'aumaina.' E pei ona tu'itu'i mai pea Pope Faranisisi, o le alofa o le natura lava lea a le Atua.

Atonu o nisi tagata e fenumi'ai i igoa i le amataga o faitauga o le evagelia: Ituraia ma Terekoniti, Lusonio o le tupu o Apilene. E maugatā i le fa'alogi pe fou fo'i i le va'aia, ae mo Luka e tāua, ona o mea o lo'o ia fa'amatala na tutupu i se nofoaga ma se taimi ma e tatau ona fa'ailoa igoa; o mea na tutupu a evagelia, o le sau o le fa'aolataga mai ia Iesu Keriso e le o se manatu matagofie, o se ofoofogia, ae o se manatu lē fa'atinoa, po o se mea na tupu i se nofoaga po'o se tala fa'asolopito. O le faiga ua fai ai e Luka ua tutusa lea ma Ioane i lana fo'i auala: 'O le Upu ua liu tino ma o lo'o nofo i totonu o tatou.' O le Liu Tino Tagata lenei – o le mea lea o lo'o tatou saununi atu e patipatia.

Metitasio

### **Tapena le Ala o le Alii**

E tusa ai ma lo tatou natura, o mālo ma aiga e i ai o latou taimi ma vaitau mo aso fa'amanatu fa'apitoa. O lenei tulaga fa'apitoa e fa'asakalametaina i tausaga a le Ekalesia. E i ai foi ona ia aso lanu-mumu, o vaitau ua fa'ailogaina i se auala fa'apitoa e fa'amanatu ai le Atua fa'aola, le alofa foa'i-ola.

Pe moni ea tatou te fa'apea e sili atu le ofoina atoa e le Atua o ia lava i ia taimi? Pe o le vai ola o kalasia o le a tafe teleina mai? O le tali poto, ou te talitonu, i le avea ai ma tagata ola e manaomia le tatau ona tatou mafaufau lelei i ai, ma o le mea moni lava lea. O le Ekalesia, i lenei auala, e a'oa'o ai i tatou i se auala sili atu ona mata'itū, ua tu'uina mai atoa ia i tatou. O le Atevetu o se tasi lea o vaitaimi fa'apitoa, o se vaitau o sauniuniga mo le tausama'aga o le Kerisimas...

Ae o le fa'atuatua i lona afio mai e lē tupu fua na o ia lava. E tatau ona tatou fafagaina o tatou fa'atuatua, ma ia fa'atinoia. Tatou te lē nofonofo ffilemu i le fale ma fa'atalitali mo lona taunu'u mai - e tatau ona tatou tamomo'e i fafo e fa'afeiloa'i ia te ia. E tatau ona tatou fesiliglia o ia; "O oe ea lea?" E tatau ona tatou mafaufau loloto i tusitusiga paia, taumafai e saili o latou uiga, ma talia le latou feau.

E tatau ona i ai ni taumafaiga i o tatou olaga i aso taitasi. E tatau ona tatou 'a'ea mauga maualuluga lea na faia ai e le Atua o Iakopo lona fale, lea tatou te mananao na te a'oa'o mai le ala e alofa atu ai ia te ia; matou te mananao e mulimuli atu i le mea e te aga'i i ai.

E tatau ona tatou aga'i atu i totonu o le ata lafoia o le puao o le vavae'eseina. I le mamao o le tafa'ilagi, va'ai – e fa'aali mai le Atua, ma i lona afio mai o le a fa'asalalauina se puao i luga o le lalolagi atoa. E tatau ona tatou mana'omia lenei saō, le ata lafoia o le puao, e motusia ai i tatou mai mea lē tatau - mea e le'o ni ana ia mo i tatou. E lē mafai ona tatou va'aia moni ia mea se'iologa e sau o ia, pe sili atu foi le ola i le puao – vavae'ese, mana'oga leleoa - talaina le misitelio. E tatau ona ufita'i o tatou agaga i le puao o le Atevetu.

Atonu e moni, i o'u a'afiaga e masani ona tupu, ua le'o le filemu i totonu e pei ona tatou mananao ai, ae ua mafatia o tatou lagona ma mafaufauga pei a sola. E mafai ona tatou lagonaina le matuā lotovaivai e uiga i lenei noa o le filemu i totonu, ae e leai se mea o le a fa'apea ai. O lea mea ua na'o se fa'aoosoga, o le satauro. E leai se auala e o'o mai ai nei lagona i le va o le Atua ma i tatou pe afai tatou te te'ena ma le filemu, ma tatou tauaveina ma le suamalie ma le onosai. Atonu, o le mea moni, o se Atevetu sili le loloto pe a tatou iloa lo tatou manaomia tele o se Fa'aola - ma o se fa'amanuia tele lea!

# FAITAUGA MO LE MASINA TESEMA 2018

## ASO 16 TESEMA ASO SA TOLU O LE ATEVETU:

Faitauga muamua: Sefanaia 3: 14 – 18.

Matua: E olioli lava le Ali’i iā te oe ma le ofo fiafia.

Salomo – Isaia: 12: 2 – 3 (tali), 4 (tali), 5 – 6 (tali). Tali: Alaga ia, ia leo tele ma le fiafia, auā e silisili ‘ese le Pa’ia o Isaraelu o lo’o afio i totonu iā te oe.

Faitauga lona lua: Filipi 4: 4 – 7. Matua: Ua lata mai le Ali’i.

Aleluia, Aleluia... Ua i ou luga le Agag o le Ali’i, auā ua na fa’au’u mai iā te a’u e folafola le tala lelei i e matitiva... Aleluia.

Evagelia: Luka 3: 10 – 18. Matua: Se a fo’i se mea matou te faia?

### ***Tofitofiga o le Upu:***

E pei o Paruka i le vaiaso ua tuana’i, ua fa’apea ona aumai e Sefanaiai lenei vaiaso se pese o le vi’iga i le Atua mo lona alofa i tagata leaga. O le olioli ma le fiafia ma vi’ivi’iga ua avatu ile Atua e Sefanaia i le faitauga muamua, ae ua vala’au Paulo i tagata Filipi e fa’ailoa i o latou olaga i le faitauga lona lua. O le Tala Lelei lenei o lo’o fa’ailoa mai e Ioane i tagata, ma o Safanaia ma Paulo ua tu’u fa’atasia le ‘Tala Lelei’ o lo’o talanoa mai ai ma le fiafia. O le tali a le tagata i se lumanā’i ua folafolaina ma le filemū – o le mea lea o faitauga o le aso Sa lenei ua vala’au mai: Olioli – Fiafia!

E ao fo’i ona maitauina o le motu o tagata ua maofa iā Ioane le Papatiso – e ui o lona uiga o se suiga i le ituaiga o le olaga – e le gata i lea, o le fa’asoa atu o mea ua e maua o lona uiga ua itiiti ai mea ua e maua; o le a tele e ave e latou e ao lafoga i lo aofa’i sa tatau ona ave – ma e fa’apenā iā i latou ona ola; e o’o fo’i i fitafita e mana’omia ona i ai se fa’ao popoga ia latou totogi ma e fao malosi mai i tagata. Ae o upu a Ioane ua maofa ai i latou: o se lagona o le fa’atalitali ua tuputupu a’e i tagata.’ O lenei a’oa’oga sa māua lelei e tagata; ole motu o tagata ua amata ona iloa lenei olaga e le na o latou ae mo isi fo’i. Ua moni lea i aso nei; o le fe’au o le suiga ua vala’auina e le evagelia, o lona uiga o le sua, e le o ‘oe lava. Ma e ui e lē logomalie ae o le Tala Lelei lenā – ma o se mafua’aga e olioli ai e pei ona masani ai Kerisiano mai seneturi ua tuana’i, ma ua mafaia lea ina ua papatisoina ‘i le Agaga Pa’ia ma le afi.’

Metitasio

### **Fa’atautaia e le Molimau a Ioane**

O le poto o le Atua ... o le fa’alia lea o le atamai ma le alofa mutimutivale lea e fa’ataunu’uina ai ana fuafuaga. I le i’uga, o mea tutupu o le a tu’uina atu i le fa’amasinoga tonu a lenei poto. Ma o ana fanau – o i latou ia ua iloa pe fa’apefea ona ulufale atu i le fuafuaga a le Atua - o le a latou molimau i ai.

E moni, o tatou auala o mafaufauga, i lea poto e le foliga mai e le matuā manino mai. O le mea moni, o le lalolagi e foliga mai e leai sona poto, ua pulea e se avanoa ua maua; e lē o fa’alia ai se galuega agai i luma a se Atua poto ma alofa mutimutivale. O le faitio masani lea tatou te feagai. Ma o le faitioga foi lea a Ioane, talu ai ua lē mautonu o ia e pei ona i ai i tatou uma – pe fa’apea e tatau ona tatou i ai - e ala i mea e tutupu. Ae e moni lava lenei mea, se’iloga e o’o i le taimi tatou te magoto atu ai i le mea moni ma tu’u atu ai lo tatou talitonuga i le Afioa a Iesu e pei ona faia e Ioane. Ma o le a tatou iloa ai, i le totonugalemu o nei magāala uma, ua i ai fuafuaga ua uma ona fa’ataoto: o fuafuaga ua fa’atautai e se poto e silisilise atu nai lo tatou, o se fuafuaga lea e tatau ai ona tatou mauā’ā i le tu’uina atu atoa i ai o lo tatou talitonuga.

O le molimau lea a le fanau a le poto, e ala i le fa’ailoaina o a latou amioga tonu i se aso i le tu’uina atu ai lo latou talitonuga i le fuafuaga a le Atua, i le tumau ai e lē fa’atuai, i le ulufale atu i le ta’ita’iga a lenei poto, e ui lava ina latou lē mautonu i ona ala.

# FAITAUGA MO LE MASINA TESEMA 2018

## ASO 23 TESEMA ASO SA FA O LE ATEVETU:

Faitauga muamua: Mika 5: 12 – 5. Matua: E tupu mai iā te oe o lē na te fai ma faipule iā Israelu.

Salomo 80: 1 – 2 (tali), 14 – 15 (tali), 17 – 18 (tali). Tali: Le Atua e, ia e fa’afō’isia i matou, ma ia fa’amalamalama mai ou fofoa; ona fa’alaina ai lea o i matou.

Faitauga lona lua: Eperu 10: 5 – 10. Matua: Ou te alu atu e faia lou finagalo.

Aleluia, Aleluia...O a’u nei o le ‘au’aua a le Ali’i; ia faia iā te a’u e tusa ma lana fetalaiga...Aleluia.

Evagelia: Luka 1: 39 – 45. Matua: Pe fa’apefea fo’i lenei mea, ina ua sau le tinā o lo’u Ali’i iā te a’u nei?

### Tofitofiga o le Upu:

O le evagelia o le asiasiga o se fa’aaliga malosi tele o le matagofie o Elisapeta i mea ua faia e le Atua: “Pe fa’apefea fo’i lenei mea, ina ua sau le tinā o lo’u Ali’i iā te a’u nei?” O lenā fesili o le a fa’aleo tele mai i falesa uma i le vaiaso nei a o fa’amanatu e Kerisiano le Sulufaga o le liu tino tagata o le Atua: Aiseā ua fa’aeaea ai i tatou i se asiasiga mai a lo tatou Ali’i lava ia, le Upu na liu-Tino? I vaega uma o le sosaiete e tele tagata o fa’atutuaga ‘ese’ese ma e to’atele o le a fa’atasi atu i nei fa’amanatuga o le Kilisimasi ma e i ai le fa’amoemoe e to’atele o le a tu’ufesili mo latou lava po’o le ā le uiga ma pe aiseā fo’i e tatau ai ona patipatia lea aso; ae mo latou e pei o Ioane le Papatiso i le manava o lona tinā – sa maitauina le i ai o Keriso, o le latou patipatia ona – e pei o Maria – o le fa’apa’iaina ona na latou talitonu i le folafolaga na faia e le Ali’i o le a fa’ataunu’uina.

Metitasio

### O le Asiasiga a Maria

O lenei mea moni ua lauiloa, ae o lo’o i ai se taunu’uga o lenei mea, e lē gata mafaufauga i ai. O le poto o le Atua i le taimi na filifili ai e auina mai ia i tatou Iesu e ala mai i le Tina Paia, o le poloaiga ua lē masuia. O lona alofa fa’atina o lo’o fesoasoani tele i lo tatou fa’alataga i le misitelio o le Liutino-tagata, le punavai lautele o kalasia, o le a fesoasoani fa’avavau i isi ana gaioiga uma, ma o le tele o vaega o lo’o fa’alagolago i ai.

Mo le nofo malamalama i lenei mea, e tatau ona tatou maitauina e tolu gaoioiga mata’utia o le kalasia o Keriso. Ua vala’auina i tatou e le Atua, fa’amasinoina i tatou, ma ua mafai ai ona tatou tutumau. O le la’asaga muamua o le galuega vala’auina lea; o le ta’uamiontuina o le matafaioi fa’aaau tatou te faia; o le onosa’i mausali o le i’uga lea o le faigamalaga. I nei la’asaga e tolu, e manaomia le galuega a Keriso. Tatou te iloa i Tusitusiga Paia le alofa moni o le Tina Paia ua auai lea ma i tatou.

E tusa ai ma le vala’auina i le galuega, mafaufaupo o le a le mea na tupu ia Sagato Ioane le Papatiso a’o i ai o ia i le manava o lona tina, ma o le a e va’afiai ai se ata o le tagata agasala ua vala’auina e le kalasia. O Ioane o lo’o i le pogisa: e lē mafai ona va’ai pe fa’alogo. Ua afio atu Iesu ia te ia e aunoa ma lona iloaina. Ua feiloa’i atu Iesu; ma fetalai atu o ia i lona loto; ua ia fafagu ma opo mai ia te ia lenei loto o lo’o moe ma le lē mautonu. O le auala lea e fai e le Alo o le Atua i tagata agasala ua ia vala’auina, ae ua ia fa’aalia mai ia te i tatou i le tulaga o Sagato Ioane i le alofa tunoa o le Tina Paia e galulue fa’atasi ma ia.

O le a le mafua’aga na alu ai Iesu ia Ioane pe afai e aunoa ma le alofa tunoa o le Tina Paia? Afai na galue Iesu i le loto o Ioane, pe le’o le leo ea o lona Tina? I le tulaga o Sagato Ioane le Papatiso, o le mea lea, tatou te iloa ia Maria o le Tina o i latou ua vala’auina e Iesu.

## ASO 30 TESEMA SULUFAGA O LE AIGA PA’IA:

Faitauga muamua Sirako 3: 3 – 7, 14 – 17. Matua: O lē mata’u i le Ali’i, e ava o ia i ona matua.

Salomo: 128: 1 – 2 (tali), 3 (tali), 4 – 5 (tali). Tali: Amuia i latou uma o e matata’u i le Ali’i, o e savavali i ona ala.

Faitauga lona lua: Kolose 3: 12 – 21. Matua: O le olaga fa’alea’iga Kerisiano.

Aleluia, Aleluia...Ia pule le filemū mai iā Keriso i o outou loto; ia nofo le afioga a Keriso i totonu iā te outou ia tele lava...Aleluia.

Evagelia: Luka 2: 41 – 52. Matua: Ua la maua o ia i le malumalu o nofo i totonu o le au aoao.

# Taulogologo

## Tofitofiga o le Upu:

Mo le sulufaga o le Aiga Pa'ia o lo'o i ai fo'i nisi o faiatauga ua fuafuaina mo tausaga C. E a'afia ai le tala mai le evagelia i le leiloa o Iesu ma toe maua i le malumalu. O le Malumalu i Ierusalema e i ai lona nofoaga tāua i le tala a Luka. O Luka e amata i le folafolaga e uiga iā Ioane le Papatiso, iā Sakaria i le Malumalu ma na fa'ai'u i so'o o lo'o vivi'i i le Atua i totonu o le Malumalu. Na molimoli Iesu i le Malumalu ina ua fanau mai. Na fa'aali lelei e Luka na faia uma e tusa ai ma sauniga ma tiute fa'alelotu. Mulimuli mai le fa'aosoosoga mata'utia o Iesu ua fa'atulaga ile Malumalu. Na ulufale atu Iesu i Ierusalem ma fa'amamā le Malumalu ona a'oa'o ai lea ile motu o tagata. E mafai la ona tatou fa'apea a'e o le fa'atulagaina o lenei tala e lē o talafeagai. O le tāua o le Malumalu o le autū mo faigatalosaga ma le pa'iaga i le talafa'asolopito a tagata filifilia a le Atua e faigata ona so'ona fa'atatau. Mo Luka, o Iesu e le'i sau e suia tulaga o lo'o i ai. Ae o ia na sau mai totonu o le tu masani, o lē e fa'aaloalo i talitonuga a tagata filifilia ma la latou feagaiga. O le tala o le asō ua o gatasī ma ia manatu; ua nonofo fa'atasi Iesu ma le 'au a'oa'o, o le fia iloa, ae na tu'u fesili fo'i – ona o ana fesili na' matuā ofo uma lava e na fa'alogo', e mafai ona tatou fa'apea ai, sa iā ia se malamalama'aga loloto i mataupu tau le fa'atua sa latou talanoaina. "Lua te lē iloa 'ea e tatau ona 'ou i le fale a lo'u Tamā?" O le Malumalu e tāua ona o le 'fale a lo'u Tamā – ole mea lea o lona uiga atoa lava, o le tagata o Iesu. O le taimi lea na mua'i fa'ailoa ai e Iesu o ia o le Alo – e lē o Iosefo, ae o le Atua. E pei o le aganu'u a le Feagaiga Tuai, o le Malumalu o le fale e nofo ai le Atua (cf. 1 Tupu 8: 28) ua alagatatau le i ai o Iesu ma fa'amatala po'o ai ia. O le talitonuga a Iutaia – Kerisiano, o le Atua e lē o taoifofia i se fale, ae o le fale ua tu'uina maia se fa'ailogia o le afio ai o le Atua fa'atasi ma ona tagata. O le moni lea mo a tatou falesā uma i aso nei – e lē na o ia nofoaga e aumau ai le Atua, ae a potopoto tagata o le Atua mo faiga talosaga ma vi'ivi'iga, o lo'o mautinoa o lo'o fa'atasi ai le Atua ma latou – e pei o Iesu i le evagelia o le asō

Metitasio

Pe fa'apefea ona ola e pei o le Aiga Paia

Le fafine, fa'atasi ma ona tapula'a, ua fafagu mai i totonu o le tagata, o ia foi e fa'atapula'aina, se fa'ananau ia atoatoa ua lē tutusa ma lona gafatia e tali ai. Na ala mai i se galala ua lē mafai ona ia tineia, ma le fia'ai ua lē mafai ona ia fa'amalieina. O le mea lea e mafua ai le ita ma le sauā o ulugali'i fa'aipoipo e masani i ia a'afiaga ma le fete'ena'iga latou te lagonaina pea pe afai latou te lē malamalama i le natura moni o le laua mafutaga ....

Afai e lē fetaia'i le tane ma lana avā i le mea o lo'o fa'asino i ai le fa'ailogia, le nofoaga e mafai ai ona la maua le atoaga o le folafolaga lea ua fafagu e le isi, ona fa'asalaina lea o i laua i le fa'aaogaina o manatu sese lea e lē mafai ona fa'asaoloto ai i la'ua, ma le la fa'ananau mo le fa'avavau, e leai se tasi e pei o le tagata e fiafia e fafagu lagona, e fa'asalaina tumau i le lē fa'amalieina ...

O le tusitala Siamani o Rainer Maria Rilke na ia fa'ailoa manino lenei va'aiga i mafutaga o le alofa, ma le lagona e fa'amutaina lenei mafutaga, e na'o le pau lea o le auala e fo'ia ai: O le fa'amaoniga lenei o le alofa i le va o le ali'i ma le tamaitai: e lua alofa e lē-uma ma ua "feiloa'i nei fa'atapula'a e to'aluia," lua alofa e lē-uma e manaomia le fetaia'i ma vaivaiga e lua, ae e i ai ma le malosiaga fa'atapula'a e alofa ai. Ua na'o le fa'ananau i se alofa e sili atu e mafai ai, la te le'i fa'aaogaina i la'ua lava i se fa'amalosi ma lē fa'afiti ia i la'ua lava, ac ia savavali fa'atasi, ta'itasi ma agai atu i le atoaga lea e fa'ailoa e le isi....

Afai e te lē alofa ia Keriso, le matalasi na Liutino, e sili atu nai lo le tagata e te alofa i ai, o le mafutaga mulimuli ua mamae, auā o Keriso o le moni lea o le mafutaga, o le atoatoaga lea e fa'asino i ai ulugali'i uma, ma o ia foi ua atoatoa i ai mafutaga. E na'o le fa'aofi mai lava o ia i totonu, e mafai i se mafutaga sili ona matagofie e mafai ona tupu i le olaga, e lē pala ma tineia i se taimi. O le mautinoa moni lena o lana fa'atalau'ula.

## KALENA MO TESEMA 2018

FA'ASOLOGA O MISASA A LE MATAGALUEGA – MALUMALU I PETONE

Aso Sa, 2 Tesema 2018 @2.00pm. – Misasa Fa'ai'u Matagaluega – Katinale John Dew

Aso Gafua aso 31 Tesema 2018 i le afiafi @ 8.00pm – Misasa Tausaga Fou – Katenale John Dew

Aso Sa 16 Tesema aso Sa Tolu Atevetu – Sulufaga Autalavou Newtown 11.00am Patele Maleko

Aso 23 Tesema - 11.30am Stokes Valley – Patele Maleko

Aso Sa aso 3 Fepuari 2019 @ 2.00pm Lotu Amata o le Tausaga – Petone - Katinale John Dew.

O Concelebrants mo Misasa uma a le Matagaluega Patele Maleko & Patele Petelo